

ASO TOFI, 14 MATI 2024

Na nofoia e le Fofoga Fetalai le Nofoa i le itula e 9:36 i le taeao.

Tatalo.

FOFOGA FETALAI: Ou te faasilasila atu ua amatalia nei Tualumaga a le Fono Aoaofa Fautulafono.

Ou te muai faatalofa atu i leni taeao fou i le paia o le Palemene ma le alofa o le tatou Maota, le afio o lau Afioga i le Sui Palemia, afio a outou Afioga i Minisita o le Kapeneta ia faapea foi Minisita Lagolago. I lea talaga atoa i le afio o lau Afioga i le Taitai o le Itu Agai, afio lau Afioga i le Sui Taitai aemaise o sui usufono mamalu uma o le Palemene.

O mamalu lava e le avea, tulou le gagana, ua maleifua mai i faguga lelei le paia o le Palemene, ina ua saunia e le Atua le ufifatafata i le galuega a le tufuga potou ua tusa foi ma le galuega o i le Efota. E tatou te faafetaia ai pea Lana tausiga alofa o lea ua tatou feiloai i manu faaifomailagi ina ua pepe salu o le taeao. Malo le soifua manuia malo le fō o le lau.

Samoa faafofoga tapuai mai i ona tulaga faalupelupeina, e faatalofa atu i leni taeao fou. E talitonu o lo o folau faaniutu pea le alofa o le Atua i si o tatou atunuu i so o se valaauina. Vii le Alii, malo le soifua manuia ma le lagi e mama. Tapuai maia ma le manuia.

E faatalofa atu foi i le tapuaiga a nai o tatou uso i Sasae, o mamalu lava e le toe tau faafuluina, o paia foi ua lolo'u faalau tapu'e, nuunuu atu ia. E matou te faatalofa atu i leni taeao i lo outou soifua manuia ma le lagi e mama.

E faatalofa atu foi i le paia o Ofisa Sili o Pulega o Matagaluega ma Faalapotopotoga a le tatou Malo, faafetai faamalolosi mai mo le lagolagoina o Tualumaga a le Palemene. Faafetai i le Atua o lo o maua pea lo outou soifua faauuina aua le valaauina, malo le lagi e mama malo le usu.

Ua sauni foi le tatou Maota mo galuega o leni taeao, ia alofagia e le Atua le tofa ma uta, ia tafatafafa i le agaga faiva o leni aso. Manuia tele le usugafono a le tatou Palemene i leni taeao, manuia le tapuai faafofoga mai a Samoa.

Ua na o se toe faamanatu a le Fofoga Fetalai ua sauni lava le gasologa o le tatou galuega. Peitai e i ai lava nai vaega itiiti ia ua ou molimauina, e ao pea ona ou toe faamanatu mo le sologa lelei o tatou tualumaga. Ou te fautuaina e lelei ona agai sao saunoaga i mataupu o lo o i totonu o Lipoti a Komiti faatasi ma Lipoti Faaletausaga o lo o faatatau iai Lipoti a Komiti faapea foi Tali a le Malo. E ao foi ona agatonu saunoaga i vaitaimi o lo o lipotia i Lipoti Faaletausaga, o faiga masani ia Faa-Palemene ma o se faataitaiga. E le faapea o le Lipoti Faaletausaga o le 2019/2020 ae tulai mai se sui usufono mamalu e agai lana saunoaga i mataupu o le tausaga 2023/2024 e le i lipotia maia.

Manatua foi, o le a lava le galuega ua tuuina atu i le Komiti e agaitonu lava a latou iloiloga i mataupu o le vaitaimi o lo o lipoti atu i le Lipoti Faaletausaga. O le vaitaimi foi lena o lo o lipoti mai ai le Komiti. Ae ua ou maitauina e ese le tausaga o Lipoti o lo o iloiloina ese tausaga o nisi mataupu o lo o fesiligia ai Taitaifono ma Minisita. E le mafai la ona manino se tali a se Komiti i se mataupu latou te le i iloiloina. E le mafai ona toe fesiligia mataupu i Tausaga Faaletupe ua uma ona faamaonia e le Palemene. E le mafai foi ona fesiligia mataupu e le i lipotia maia i le Palemene, pe a fua i le galuega o lo o tatou tagofia nei.

O aiaiga ia o tatou Tulafono Tumau. Afai e i ai le mataupu e finagalo sui usufono mamalu e fesiligia e ese mai galuega o lo o tagofia nei e ao ona amanaia avanoa e tuuina mai ai fesili, mo le faaaogaina ai o le taimi o galuega mo sui usufono taitasi i aso fonu lona tolu i vaiaso taitasi e tusa o tatou Tulafono Tumau.

Ua atulasi foi ona ou faamanatu o Aso Tofi o vaiaso uma o tatou Fonotaga e ave le faamuamua i Fesili ma Tali, peitai e le o faaaogaina lava ia avanoa taua. Ua faamaonia mai foi e le Failautusi i le aso ananafi e leai ni fesili na tuuina mai e tusa o aiaiga o tatou Tulafono Tumau mo le faaaogaina ai o avanoa i lenei taeao. Ua toe afea i se upu a le Fofoga Fetalai lea tulaga mo le sologa lelei o le tatou galuega. Ae i ai le faamoemoe i le tofa ma le uta paia a le Palemene o le a tatou galulue faatasi.

Lua, e i ai se faamanatu a le Fofoga Fetalai, o le puipuiga lava o Taualumaga a le Maota aemaise foi o le tulaga na tulai mai i le aso ananafi. I le matau lava ia a le Nofoa e le o faautagiaina a tatou Tulafono Tumau aemaise lava a tatou Tulafono i faauilavea. Manino ma malamalama tatou faauilavea i totonu o tatou Tulafono Tumau, e agai mai lava le talosaga i le Nofoa ona avatu lea o le avanoa e le Nofoa. E le mafai ona tutulai se sui usufono ma faaauau sana faauilavea ae le i avatua se faatagaga a le Nofoa. O tatou Tulafono Tumau ia e ao ona tatou toe faamamaluina.

O le amataga foi o lenei Nofoaiga sa faamamafa ai lava e le Taitai o le Maota le tulaga lea ona o le manatu lava ina ia sologa manuia tatou Fonotaga. Peitai, ia o le uiga lea o le tatou avafatafata lea lava e faatino i le tele o tatou fonotaga.

Ua i ai le manatu o le Nofoa o le a amata i le aso ma o le lapataiga mulimuli foi lea a le Fofoga Fetalai. O ai lava se tasi o le a tulai mai ma faaauau sana saunoaga e aunoa ma le faatagaga a le Nofoa o le a tatou o loa i tatou faasalaga pei ona i totonu o tatou Tulafono Tumau ia ma faatino ai loa, ma e le mafai ona toe solomuli. O lona uiga o ai lava o le a faatinoina lea tulaga i aso fonu e amata atu nei i le aso ua fai lava e ia lona ia faaiuga.

Ma le agaga faaaloalo ou te faailoa atu ai e ao ona tatou galulue faatasi ma e manatu tele le Nofoa i le avafatafata ma le alofa atu i le paia o le Palemene aemaise a outou Afioga i sui usufono mamalu. Ae i ai foi le agaga o le Fofoga Fetalai tatou galulue faatasi e manuia ai le tatou Fonotaga ma sologa manuia ai mea uma o le tatou galuega.

O le fautuaga lena ma o le lapataiga mulimuli foi lea a le Fofoga Fetalai i le tulaga lea i le agaga faaaloalo.

Susuga Hon Laauli Leuatea Polataivao Fosi (Minisita mo Faatoaga ma Faigafaiva): Lau Afioga i le Fofoga Fetalai...

FOFOGA FETALAI: Malie lau Afioga i le Minisita sei...

Susuga Hon Laauli Leuatea Polataivao Fosi: Faafetai mo le avanoa, faatalofa atu foi i lau Afioga i le Fofoga o le Fono i leni taeao fou aemaise foi o le paia o le Palemene ma le faafofoga mai a si o tatou atunuu. O lea ua malele lau Afioga i tulaga o le tatou Fono ma e momoli atu ai le agaga faafetai tele ona o le apoapoiga ma le faatonuga ua aumai. O a foi ni sasa o le aso ananafi, ia ua te'a apolima e le toe fia manatua foi, o uiga lava ia o tatou fono e aumai ma avatü, tatou maua le loto faamagalo.

Peitai lau Afioga i le Fofoga Fetalai ua ou tulai atu lava leaga o lea ua i ou luma faamaumauga uma o le tatou Fono ananafi ma upu faamaumau. Ou te popoe tele leaga o faamaumauga nei e faavavau. O lea ua ou maitau ua aveese upu na ou lafo ae le o aveesea upu na lafo mai. O lo o i ai tuuaiga tuga tele e uiga i le mataupu leni o le BluWave e faapea o lau Kamupani ae \$2 miliona a le Malo ua faaalu ai. Lau Afioga i le Fofoga Fetalai e leai se faamaoniga o mea na ma ou te tapa ai, a faapea e leai ni faamaoniga e aumai ia ona ou talosaga atu lea i lau Afioga.

Ou te faatu le Lafo, *Aveese faamaumauga ia ma le Palemene e le moni. E leai sau Kamupani e tau o se BluWave, e leai foi se \$2 miliona na aumai se Kamupani faapea o le BluWave e fai ai le Initaneti a Samoa.*

O le ala lea lau Afioga i le Fofoga Fetalai, o lea ua faauiese uma upu i lau talosaga ona o le ma felafolafoaiga ma le Tofi o Faleata. A o lea e maitau o lea e tumau upu a le Afioga i le Taitai o le Itu Agai e tuuaia leaga ai au. O lau Kamupani le Kamupani lea ma ua faaalu ai foi le \$2 miliona a le atunuu. O le ala lea lau Afioga afai e leai ni faamaoniga, ona malie lea lau Afioga i le Fofoga Fetalai, ou te faatu atu le Lafo, *Aveese ia saunoaga ma faamaumauga a le Palemene leaga e le sao.*

O le Lafo lea lau Afioga.

Faaluaina e le Sui Palemia.

FOFOGA FETALAI: Ia, ua lelei faafetai o lea ua maua atu le agaga o lau Afioga i le Minisita o lea ua maea ona aveese saunoaga a le sui usufono o Faleata 3 ae toe o saunoaga a le Taitai o le Itu Agai. O lea ua faatonu le Failautusi ina ia tuueseina.

Susuga Hon Laauli Leuatea Polataivao Fosi: Faafetai.

TUUINA ATU O PEPA

Na tolaulauina e le Failautusi i le Fono Aoa le faasologa o Pepa e tusa ai ma T.T.49(2).

1. P.P.2023/2024, Nu.152 Tali a le Malo i le P.P.2023/2024, Nu.91 Lipoti a le Komiti o le Vaega o Atinae Eeseese i le P.P.2022/2023 Nu.162, Lipoti Faaletausaga a le Auaunaga o Vaa o Samoa mo le Tausaga Faaletupe 2021/2022.

Ma le faaaloalo lau Afioga.

ILOILOGA O LIPOTI A KOMITI FAA-PALEMENE MA TALII A LE MALO

P.P.2022/2023 NU.58, LIPOTI A LE KOMITI O LE VAEGA O ATINAE ESEESE I LE P.P.2020/2021 NU.102, LIPOTI FAALETAUSAGA A LE PULEGA O FELAU AIGA I LE LAUELEELE MO LE TAUSAGA FAALETUPE 2019/2020 - ILOILOGA

P.P.2023/2024 NU.23, TALII A LE MALO I LE P.P.2022/2023 NU.58

P.P.2022/2023 NU.126, LIPOTI A LE KOMITI O LE VAEGA O ATINAE ESEESE I LE P.P. 2021/2022 NU.54, LIPOTI FAALETAUSAGA A LE PULEGA O FELAU AIGA I LE LAUELEELE MO LE TAUSAGA FAALETUPE 2020/2021 - ILOILOGA

P.P.2023/2024 NU.24, TALII A LE MALO I LE P.P.2022/2023 NU.126

P.P.2022/2023 NU.53, LIPOTI A LE KOMITI O LE VAEGA O ATINAE ESEESE I LE P.P.2020/2021 NU.73, LIPOTI FAALETAUSAGA A LE PULEGA O MALAE VAALELE MO LE TAUSAGA FAALETUPE 2019/2020 - ILOILOGA

P.P.2023/2024 NU.25, TALII A LE MALO I LE P.P.2022/2023 NU.53

P.P.2022/2023 NU.117, LIPOTI A LE KOMITI O LE VAEGA O ATINAE ESEESE I LE P.P. 2020/2021 NU.128 MA LE P.P.2021/2022 NU.55, LIPOTI FAALETAUSAGA A LE FAALAPOTOPOTOGA O VAA A SAMOA MO TAUSAGA FAALETUPE 2019/2020 MA LE 2020/2021 - ILOILOGA

P.P.2023/2024 NU.28, TALII A LE MALO I LE P.P.2022/2023 NU.117

P.P.2023/2024 NU.60, LIPOTI A LE KOMITI O LE VAEGA O ATINAE ESEESE I LE P.P. 2023/2024 NU.14, LIPOTI FAALETAUSAGA A LE FAALAPOTOPOTOGA O VAA A SAMOA MO TAUSAGA FAALETUPE 2021/2022 - ILOILOGA

P.P.2023/2024 NU.143, TALI A LE MALO I LE P.P.2023/2024 NU.60.

P.P.2022/2023 NU.125, LIPOTI A LE KOMITI O LE VAEGA O ATINAE ESEESE I LE P.P.2021/2022 NU.51, LIPOTI FAALETAUSAGA A LE PULEGA O LE SUAVAI A SAMOA MO LE TAUSAGA FAALETUPE 2020/2021 - ILOILOGA

P.P.2023/2024 NU.32, TALI A LE MALO I LE P.P. 2022/2023 NU.125.

P.P.2022/2023 NU.123, LIPOTI A LE KOMITI O LE VAEGA O ATINAE ESEESE I LE P.P. 2021/2022 NU.7 MA LE P.P.2022/2023 NU.27, LIPOTI FAALETAUSAGA A LE AUAUNAGA O VAA A SAMOA MO TAUSAGA FAALETUPE 2019/2020 MA LE 2020/2021 - ILOILOGA

P.P.2023/2024 NU.61, TALI A LE MALO I LE P.P.2022/2023 NU.123.

P.P.2022/2023 NU.52, LIPOTI A LE KOMITI O LE VAEGA O ATINAE ESEESE I LE P.P.2020/2021 NU.6 MA LE P.P.2021/2022 NU.44, LIPOTI FAALETAUSAGA A LE MATAGALUEGA O GALUEGA, FELAUAI MA ATINAE ESEESE MO TAUSAGA FAALETUPE 2019/2020 MA LE 2020/2021 - ILOILOGA

P.P. 2023/2024 NU.96, TALI A LE MALO I LE P.P.2022/2023 NU.52.

P.P.2022/2023 NU.120, LIPOTI A LE KOMITI O LE VAEGA O ATINAE ESEESE I LE P.P.2021/2022 NU.4 MA LE P.P.2021/2022 NU.49, LIPOTI FAALETAUSAGA A LE FAALAPOTOPOTOGA O LE MALOSI FAALLETISE MO TAUSAGA FAALETUPE 2019/2020 MA LE 2020/2021 - ILOILOGA

P.P.2023/2024 NU.97, TALI A LE MALO I LE P.P.2022/2023 NU.120.

FOFOGA FETALAI: Tulai mai lau Afioga i le Taitaifono o le Komiti o le Vaega o Atinae Eseese.

Afioga FEPULEAI FAASAVALU FAIMATA SUA (Taitaifono o le Komiti o le Vaega o Atinae Eseese): Faafetai i lau Afioga i le Fofoga Fetalai. Viia le Atua i leni taeo fou ua momoli mai lo outou soifua ma so tatou ola aua lava le feagai ma fonotaga i leni aso.

Ae ou te tulai lau Afioga i le Fofoga Fetalai ou te faatu le lafo, *Ina ia faautagia e le Fono Aoa Lipoti e iva (9) a le Komiti o Vaega o Atinae Eseese o lo tuuina atu ai ana Saililiga, Fautuaga ma Iugafono.*

Faaluaina e le sui usufono mamalu mai Vaimauga I ma le sui usufono mo Aana Alofi I.

Na faamaonia le lafo.

FOFOGA FETALAI: Ou te tapa lau Afioga i le Minisita mo Galuega, Felauaiga ma Atinae Eseese.

Tofa Hon OLO FITI AFOA VAAI (Minisita mo Galuega, Felauaiga ma Atinae Eseese): Ou te manatu o lea ua maea ona e toto le taamu teevao aua foi le tatou vatapu ma le tatou Matai Silisiliese, Lē ona le manava ola, ma le malosi uma lava ua tatou fesagisagi ai i lenei taeao fou i Lona matagofie i le magafetau o le soifua ma le ola e pei o le upu i le Alataua.

E faatalofa atu ai i lau Afioga i le Fofoga Fetalai. E moni e le uma lou lalelei ma lou aulelei i lenei taeao ma aso uma. E faatalofa atu foi i lau Afioga i le Sui Palemia ma lau Afioga i le Taitai o le Itu Agai ma le paia o le Kapeneta ma Sui Minisita, faapea foi le paia maualuga o sui usufono o le Palemene.

E faatalofa atu foi i lau Afioga i le Failautusi ma le Sui Failautusi mamalu o le Palemene, e faapea foi ona faatalofa atu i Ofisa Sili o Pulega o Matagaluega ma Matagaluega Tumaoti a le tatou Malo.

E manatua ai foi le tapuaiga a le mafua faalepa o le mamalu o si o tatou atunuu i Samoa nei ma atunuu i fafo o lo o faapena ona taputapu mai ma tatalo mai, a o alofaiva le tatou Palemene, o tatou o Taitai o le atunuu.

Ae ua ou tulai atu ma le ava tele ma le faaaloalo lau Afioga i le Fofoga Fetalai e faatu le lafo, *Ina ia faautagia e le Fono Aoa Tali a le Malo e faatatau i Fautuaga a le Komiti o le Vaega o Atinae Eseese e tusa o Lipoti e tele lava e iva (9) ua faautagia e le Fono Aoa.*

Ma e talitonu le taofi lau Afioga i le Fofoga Fetalai, ua manino ma malamalama sui usufono mamalu uma i nei Lipoti e tele e iva (9) mai le 2019 agai le 2020. Aua e le gata e faa-Samoa uma Lipoti lau Afioga i le Fofoga Fetalai, a o nei foi Lipoti ua leva. Ae se i vagana lava lau Afioga i le Fofoga Fetalai e i ai se sui usufono mamalu e manaomia se fesoaoani i lona vaivai ona fesili mai lea ae ou tali atu.

O le lafo lea lau Afioga i le Fofoga Fetalai.

Faaluaina e le Minisita mo Faatoaga ma Faiga Faiva.

Na faamaonia le lafo.

FOFOGA FETALAI: Ia o lea ua maea faautagia Lipoti e 9 a le Komiti o le Vaega o Atinae Eseese faapea foi Tali a le Malo i Fautuaga a le Komiti.

Ia o le avanoa lenei o ni sui usufono taitoalua mai itu ina ia talanoaina le tatou Lipoti. O lea ua muamua mai le Taitai o le Itu Agai.

Tofa Hon Olo Fiti Afoa Vaai: Lau Afioga i le Fofoga Fetalai faafetai o lea ua muamua mai le vaivai muamua.

FOFOGA FETALAI: Ia o lea ua muamua mai le Taitai o le Itu Agai aua o ia lava na saunoa ua lava le tailua o sui usufono mai itu e saunoa.

Susuga Hon TUILAEPFA FATIALOFA AUJLUA SAILLELE MALIELEGAOI (Taitai o le Itu Agai): Ia o lau Afioga lava foi sa e saunoa mai so o se isi lava e fia saunoa mai lenei itu toaitiiti, aua e leai se aoga e toe soona saunoa ai le la itu.

Lau Afioga i le Fofoga Fetalai ou te tulai atu foi i lenei taeao e momoli atu le faamalo ma le faafetai o lea ua maea ona e tãpã tulia i le tata, o le tatou faafetai lea i le Atua i Lona alofa ma Lona agalelei ma faatupu manatu pea ia i tatou uma, aemaise lau Afioga i le soalaupuleina o mataupu e atiae ai si o tatou atunuu. Faamalo foi i le maleifua mai lenei taeao i tofaga malu o le Afioga i le Sui Palemia ma le Kapeneta ma lena itu, ma lenei itu o le tatou Maota, aemaise a outou Afioga i Ofisa Sili o Pulega o Matagaluega o outou o limataumatau o le Malo ma le Palemene.

Ia e faapea foi le faafogafoga mai a Samoa i ona tulaga faalupe aemaise auauna a le Atua ma le latou faanonogamanu.

E faapea foi le taputapu mai a tatou uso a Malo e le o ni uso taufeagai, a o uso tuofe i le Malo o Tutuila i le Kovana ma lana Aufono, o i latou foi i Maota e Lua Faitulafono, ma le mamalu aua le Faleagafulu ma le Nofo a Maopu, Faatui ma Tootoo ma upu i le Manuatele.

Ia, o upu amata ia i lenei taeao e faatalofa atu ai aua la outou tapuaiga. Ae faautagia lau saunoaga, o le agaga foi lena ia te au ma lenei itu toaitiiti, o le lagolagosua i le tatou Malo e avatu a matou fautuaga. E i ai taimi e avatu ai fautuaga pei e tau maai teisi, ae o uiga lava na e le mafai ona suia e le Atua le leo o le tagata, a aumai lava e malu lou leo e malu. A aumai foi e paovale, ia o ai na te faitio e le o le Atua na faia mea uma lava.

Lau Afioga i le Fofoga Fetalai, e taua tele Lipoti nei e lua, lea foi na saunoa le Minisita e ui lava o Lipoti e faasinotonu i le tausaga 2019, a o le mea sili lea ua tatou oo i ai. E tele foi le aoga o fautuaga ia e aumai, e faafetai ai i le Komiti ma a latou fautuaga. Ma e ou te talia fautuaga, o fautuaga lelei mo le agai i luma o le tatou galuega.

E i ai nai vaega ia lau Afioga i le Fofoga Fetalai e faatupu manatu. O tatou Lipoti uma lava nei, e amata i le faataoto mai o le Tulafono 75 e taitaiina ai felafolafoaiga. O le itu taua o lea ou te maitau, o tulaga uma lava e aafia ai mea tau tupe ma faiga faavae, o lea e taoto i totonu i terms of reference a Komiti. O lona uiga e aofia ai ma vaegatupe o lo o alu. Ma o le Tulafono foi o mea tau Paketi, le faaaluina o tupe a so o se atunuu e pulea faa-Temokarasi, e leai se sene e sau i totonu, e leai foi se sene e alu i fafo e aunoa ma le aumai iinei i le Palemene e oo i ai le leo o le Palemene lenei. E oo lava i vaegatupe mai fafo faameaalofa, o lea e sau i luma o le Paketi i le tulaga o itulau o lo o lisiina faa-Roma. Afai la e leai seleni e sau i totonu, o i ina e fanau mai ai le mea lea o le pulepuletutu o tupe a le atunuu. O le vaega muamua lena o lau tautalaga.

Ma i lau maitau i le tausaga lenei, o se tausaga uiga ese le taua o faaiuga sa fai ai, lea e lisi mai le Lipoti. E 20 atinae tetele sa faatino ai. E 11 i Upolu, 9 Savaii. E 38 galuega tetele ma galuega laiti. A tuufaatasi le lua lea ona maua ai lea o le

58 galuega tetele sa faatino i le taimi lea, lea e faasino i ai le Lipoti lenei. E i ai ma galuega ua uma ona faatino mo fuafuaga faa-poloketi ua faataoto o le a faatinoina, e faapei la o le tusiaina o ata mo le auala i Tanugamanono agai Siumu, maea fausia o alavai e 3 i fanua faasao i Malaefatu - Sogi, alavai faafeagai ma le Ofisa o le Komesina o Ausetalia ma le Ofisa o le Komesina o Niu Sila, ma le maea tuufaatasia o le konekarate mo iloiloga tau aafiaga o le siosiomaga ma le atunuu lautele mo le ausia o se maliega o atinae ma le lipoti mo alavai o le sima talivai i Vaisigano. E aofia ai ma poloketi mo le lumanai lea e lisi mai i le Lipoti.

Faamalo atu lava i le Komiti i le faaleleia o auala i Tanugamanono e agai i Siumu. O femalagaaiga e mafai ona tali atu i suiga o le tau. Faalaugatasia o vaega mati'e ma vaega mauualalo o le auala agai le itu i Sasae ma le toe fausia o le aualalaupapa mo Lelata. Ua uma foi ona fai i le tausaga lea tenders ma o lea ou te manatua na malo ai le tender a Ah Liki Brothers. O le faafesili lena. Po o le a la le tulaga ua i ai? Aua ana faatino le tender lena na aupito i mauualalo semeanu faapenei lava o maua galuega a le tatou atunuu. O le itu taua lena o le Lipoti lenei.

E i ai vaega e taua tele, o ni faaletonu o lena taimi ma e tataua lava ona vaavaai totoa i ai, o mea nei o alavai. O le a le lelei o se auala e kalepe lava e alavai, i le papau o alavai. O la e tupu i le taimi nei. Ma ou te manatu e lua lava auala e taofi ai le mea lea, o le avatu o konerate o la e i ai le poto masani.

E tele le mau Konekarate ia ou te vaai ai, e latou te le i asua lava se suo e fai ai se auala. Ae taua tele fautuaga ia ua aumai e le Komiti lea. O le auala lea e i i e alu atu i Vaimea, Ia lea o le a ou taua atu i lena foi vaitaimi ua leva na ou fautuaina e le au isinia e matua... lamatia tele fanau a le atunuu i le sau lea mai uta i le vai lea e i uta lea e tafe tele e agai mai i tai i Vaimea. A oo ina timu, e alu atu uma i ai le suavai o le Mount Vaea, e alu atu i i. Ou te le iloa pe na faapefea ona tupu lea mea. Ona sau lea o le vai e tafe mai agai i tai ma atili vailalao ai eleele ia i tai i Saleufi ma Taufusi. A o la e i ai le vaitafe e tataua ona faatafe i ai e le mamao i gauta.

O galuega e fai e inisinia e faataua tele la e lenei sui usufono ma le vaega nei le mea lea e aumai i totonu i i e vaaitotoa i alavai. O le mea foi lena lea e afaina ai tatou aualagalua, o le mea lea o le le lelei o alavai. Mai le 1999 na faatoa faata ai auala. O tua atu e le i faatania ni auala ae o le 1999 na amata ai e le Minisita o Galuega ae na amata i Faleasiu. E taugata ae o le taua o le mea lea o le faata, e le tafe ese ai le asuemu lea e tanu ai le auala. E ui lava la ina taugata le polokalame lena, e tataua lava ona tatou taumafai e faafaigofie le faigamalaga a tagata i uta. E le gata e atili alu ai i luga atinae a tagata ua nonofo i luga o latou faatoaga ae faapena foi ma le faasaoina mai i faalavelave tutupu faafuasei, Tsunami e oso mai le sami. E tele la le taua o le atinae lenei o auala e faata lelei...

FOFOGA FETALAI: Toe lua minute o le sui usufono...

Susuga Hon TUILAIPA FATIALOFA AUELUA SAILELE MALIELEGAOI: Ae ua atili faatauaina ina ua oo i le tausaga e 2009 ua

faataga loa e tatou le suiga o auala tetele e o i le itu tauagavale ina ia mafai ona sau ai taavale mai Niu Sila ma Ausetalia. O le taimi lenei, e mafai lava na o oe toatasi ona e oso i lau taavale alu i uta fai lau faatoaga ma ua tatau ai ona tele mea e tatau ona tatou gaosia i luga o le laueleele ma ave i fafo.

Lau Afioga i le Fofoga Fetalai, o le itu taua lena i tua atu o le 1972, na o le \$800 tala na tufa i nuu e o e fai latou auala. Na ou alu lea i le taimi lena i le 1972 e fai mai le lipoti i ina i Saleaula ma le nuu na e i tala mai po o le a le tulaga o lea faiga faavae na fai mai le tausaga 1972. Ou te alu atu, o la e asu i mea o suoasu le palapala i totonu o le auala e faaputa ai le ogatotonu o le auala ma faaoga melei e sua ai aua e leai ni tolopa. Ou sau loa fai lau lipoti e ave i le Kapeneta e tuu lenei mea ae tatau na o le Malo e fai le auala. Lea la na tuu ai loa lea, a o le polokalame na amata mai i le taimi o Niu Sila. Lea la na amata ai loa ona o le Malo e faatino ia... E fai auala galue, a o le faiga sa i ai e faatoa fai lava le tou auala ina ua o atu masini a le Malo e faalelei le tou auala lea e i tai. A avanoa ona o lea i le afiafi, o faaleleia. Ua tele lava la suiga lea ua i ai ma ou te fautuaina le mea lea e aumai e Komiti mo le faaleleia atili o tatou auala.

Lau Afioga i le Fofoga Fetalai, ia lea ua uma lou taimi.

FOFOGA FETALAI: Faafetai. Malo faafetai. Malo saunoa. Faafetai foi timai aua lava le agai i luma o le tatou atunuu aemaise o le faalauleleina o tatou auala.

Tulai mai lau Afioga i le Sui Taitai. Malie le sui usufono mo Alataua i Sisifo leaga o lea ua soofau le Taitai ma le Sui Taitai.

Tofa Hon LAUOFO FONOTOE NUA FESILI PIERRE LAUOFO (Anoamaa 2): Faafetai i lau Afioga i le Fofoga Fetalai. E faatalofa atu i lau Afioga i le Fofoga Fetalai i lenei taeao ia faapena foi lela itu o le Maota. Ia, eetai foi le paia maualuga o Afioga i sui usufono o lenei itu o le Maota.

Ia, ua maea ona e momoli lapalapa o malo i lenei taeao. Malo faafetai, ua e pai foi i le tapuaiga a le atunuu. E le toe agai sau tala i lena ona e puupuu lou taimi ae faatauaina tele Lipoti pei ona oo mai ma folasia i le Laulau a Fono. Ua saunoa foi le Afioga i le Taitai o le Itu Agai i ni mataupu taua e pei ona i ai le tatou auala lea e agai i tua i Siumu amata atu i Malifa po o Tanugamanono seia paia le afioaga po o le itumalo o Siumu i le la itu o le motu o Upolu. E taua tele le vaega e pei ona aumai ua leva ona maea pei sa maea i le vaitaimi ia le ata o le auala lenei po o le design. O lea e momoli atu ai le faafetai. A o lea ua maitau pei ua tau amata le tatou galuega lenei ae amata mai i le itu o Siumu.

Ae o le fesili i lau Afioga i le Minisita, o le tulaga i le ata pei ona saunoa foi le Taitai o le Itu Agai i le taua tele o mea nei o alavai. O le auala la lea e agai i Siumu e faafesili atu ai i lau Afioga po o le a se tulaga faamalamalama mai lau Afioga tulaga o alavai aua e pei lava ona silafia e le natia le tulaga o le ae lea i luga i Tiavi toe ifo i lalo i le la itu. Ae tele tele le suavai e pau i luga o mauga ia ma a le lelei tatou alavai, o lona uiga e toe leaga uma le tatou auala lea ona maumau ai lea o le taimi faapea foi ma tupe faaaluina ai. A o le maitau a lou sui usufono, e manaia tele pe a fai ni alavai foi ia e tatai ai le vai po o le excess water lea e pau i luga o mauga ia agai i le vanu la e i le itu la.. le itu i Sasae o

le auala lea i le agai i tua. A tele ni alavai laiti foi ia e tatai i ai le vai lena, ia ua lelei tele. Aua o lea foi sa maitau i timuga, i nai timuga foi i le aso ananafi, malosi tele ma e tele tele le suavai lea e tafe mai i luga. A o le amio lava lea o le suavai, e pau i le mauga e saili lona auala i le sami. O lona uiga, e tele lava mea e faaleagaina e le suavai lea e tafe mai i luga. E le gata la i auala ia ae faapea foi maota ma laoa ia ma fanua o nai tagata o lo o... i le Fale Vaimauga ia faapea foi i le... Faleata.

O le mea lea ou te fesili atu ai i lau Afioga po o ua lava tapena tulaga o alavai ia. Ia atonu o le tulaga foi lena e lelei ai le tatai o vai ia agai i le... i le vanu lena aua le faamoemoe lea pei ona taua o se faatanoa i i Alaoa e pue ai le suavai lea ma faasoaso, le faaaogaina o le suavai lea i le taulaga o Apia, Fale Vaimauga ia faapea foi Faleata, ae le gata i lena o le tatou eletise. Ia a o le fesili lena e pei e agai atu i tulaga ia ona lea e aumai i le Lipoti le vaega lena.

O lo o aumaia foi i le Lipoti a le Komiti tulaga o le faamamaina o tatou tafaala. O le teuteuina ma le moaina o tafaala. Ia, e maitauina i lenei vaitau ia o lo o tele foi tafaala e le o teuina po o le a le tulaga o lo o i ai konekarate. Po o le mea ua faamatuu atu i Itumalo i Fono Faavae, latou te tauaveina ma faatino lea matafaioi ae pe maua ai foi se seleni. Ia e pei o vaega ia ona o le maitauina ua faapena ona tele o tafaala ua le teuina i lenei vaitau pe a agai i tua ma isi vaega o le tatou atunuu.

Silasila lau Afioga i le... masalo o le fesili lea e agai i le Taitai Komiti. Silasila lau Afioga i le Itulau 5 o lau Lipoti i le Gagana Samoa. O lo o aumai ai ma faataoto mai ai le table na o mea o... O lea e faaupuina o le polofiti, tupe maua ia ma tupe faaalu. O na e aumai o le polofiti po o le tupe faasili masalo o le sao lea o le tauga. Tausaga Faaletupe 2019/2020. Lipoti muamua lea i le tausaga lea o le 2019/2020, na e aumai o le polofiti lena e faaaoga mai. A o lea ou te maitau atu i le Lipoti a le Komiti a lau Afioga i le tausaga e sosoo ai i le table lava e tasi o lea e aumai o le tupe pau. E le mafai na tupe faasili i le isi tausaga ae tupe pau i le isi tausaga a o le vaega tupe e tasi. Se i e silasila ane po o le a se faamaninoga o le vaega tupe lea. Aua o le tulaga lena lea e pei e... e le o manino i ai lau vaai a o se saunoaga malamalama a lau Afioga i le Taitaifono i ia tulaga. Green Climate Fund lea e aumai i le Lipoti aua le tulaga o poloketi o lo o faagasolosolo ia aemaise lava le puipuiga o aseta a le tatou malo. Faataitaiga o auala. O le a se faamaninoga o lau Afioga i le Minisita i le faaaogaina o le tupe lea, vaegatupe lea o le Green Fund aua tatou taligalu e puipui auala o le Malo. O le tele o auala a le Malo ua faaleagaina aemaise o le matou itumalo ona o le malosi tele o galu i le masina lea ua tea atu nei. Ia ma o lo o faapena ona agai i luma le faaletonu ona o suiga o le tau ua aafia ai tatou. Ia se i silasila ane lau Afioga i le faaaogaina o nai seleni na. O tulaga na e pei ona ou talanoa atu ai ia faapea foi tatou aualagalua o lo o aumai foi i mo access roads. Ia sei silasila iai lau Afioga i le Minisita aua o le tele lava o aualagalua ua faataina ae i ai aualagalua e le i faataina e le i oo ai lava le ta i ai, e pei foi o auala o le matou itumalo na faatalosagaina i lau Afioga. Ae i ai isi auala galua ua... ua tele tausaga talu ona maea ona faata ma sa faaaogaina lava tulaga foi ia o fautuaga a le tatou Malo ma le tatou Matagalua e taumafai e see i uta ona o suiga o le tau aua tulaga tau Tsunami ma tulaga faapena. O lona uiga, e i ai

auala galue o lo o taofi ua tatau ona ave e le Malo ma tau o auala o le malo, public roads ae le toe taua o ni access roads. Ae se i silasila lau Afioga mo le faaleleia o auala na aemaise a auala ia e o i uta i lenei itumalo.

Ia pei o nai manatu ia lau Afioga i le vaega ia o Lipoti pei ona aumai. E momoli atu ai le faafetai.

FOFOGA FETALAI: Malo faafetai. Ia, se i tulai mai le sui usufono tamaitai mo Alataua o Sisifo.

Afioga ALIIMALEMANU MOTI MOMOEMAUSU ALOFA TUUAU (Sui Usufono Tamaitai - Alataua Sisifo): Ia, faafetai mo le matou avanoa. Tatou te au faatasi foi i le viiga ma le faafetai i le Atua na e molia i le taeao ua toe maua lenei aso fou, ma le malosi faafouina e faaauau ai la tatou galuega.

E 9 Lipoti ia e aumai ae na o le 3 e fai atu ai se manatu, ua uma ona saunoa le Taitai ma le Sui Taitai i le tulaga i le Pulega o Felauaiga. Ae sala foi ina tele tala i le LTA ona o i latou tonu ia e vave ai lava ona iloa e le atunuu ni galuega e ausia. Aua foi tatou te vaai lava i ai i galuega ausia i auala, o aualalaupapa. O le Lipoti la lea o le 2019/2020 ma le 2020/2021, e momoli atu lava le faafetai i le Komiti i le auiliiliina o galuega na ausia. Ou te fia faaleoina lou agaga faafetai i le Tamaitai sa faafoeina pe sa pulea le... le Pulega lea o le LTA. Ona o le Tamatai ae a ou faitau atu i galuega ausia e ese le tele. O i e iloa ai e i ai foi le sao o nai Tina i le atinaeina o le tatou atunuu.

O le aualalaupapa i Maliolio, le aualalaupapa i Vaisigano, o le auala kolosi i le Loto Samasoni, poloketi o le auala i Vaiaata ua na o se 4 lava ni galuega tetele lea tatou te molimauiina, aua tatou te ui uma lava i auala ia. Ou te momoli atu ai lava le faafetai i galuega tetele ia na ausia i le vaitaimi a o tulai mai le Afioga ia Galumalemana Titi Schwalger. Ae i ai nai a'u fesili lau Afioga i le Fofoga Fetalai e ui atu i le Nofoa i le Lipoti a le Komiti. O le mea mataina i le Lipoti a le Komiti nei o Atinae e na o le tai-1 lava itula lea e vaai atu e faitau atoa ai lava le Lipoti ma fai uma ai le asiasiga ma fai ai ma le Lipoti, manaia o le faasaoina o tupe a le tatou atunuu i le tai-1 o itula e fai ai le galuega.

Lau Afioga i le Minisita, o le tulaga lea i a tatou konekarate ia i nuu ma afioaga e pei foi ona maua e nisi o sui usufono. Ae o lau fesili, ona o le Tali a le Malo lea e i ai e tusa pe faamatuu atu i tua e i ai pea le faamalumaluga a le Pulega o le LTA, pe o lelei ona faatino. O lona uiga e tusa lava la pe faamatuuu i tua i nuu ma afioaga, e tatau pea ona monitor atu e le LTA? Aua pei o le popolega lena lea e maitau atu ai i fautuaga ma le Tali o le a 51 itumalo, o le a monitor atu e le LTA tafaala nei i le moaina o vao ma le faamamaina o alavai. Ua na o se fesili.

O lona lua, o le tulaga lea i le fautuaina lea o le 24 masina e tatau ai ona taofi le tupe o se galuega o konekarate fai auala, ona faatoa matuu atu lea o le tupe pei ona i ai aiaiga faa-konekarate. Lau Afioga i le Minisita pe le i tele tele lea 24 masina aemaise a nai konekarate laiti fai auala. Tuai konekarate tetele ae pe le tuu pea i le 12 masina e aiaia ai ma maitau po o lelei ona faatino ona faamatuu lea o a latou seleni. Ua na o se tuualalo ia ae pule pea outou...

Tofa Hon Olo Fiti Afoa Vaai: Lau Afioga i le Fofoga Fetalai...

FOFOGA FETALAI: Malie lau Afioga i le sui usufono mamalu, se i tulai mai lau Afioga i le Minisita.

Tofa Hon Olo Fiti Afoa Vaai: Ou te faamalulu atu i le Afioga i le sui usufono mamalu o Alataua i Sisifo, o lea e le i avatua se tali a le tatou Malo. O le fautuaga lea o le fautuaga a le Komiti pe mafai ona tuutuu atu i le 24 masina i le mea lea o le Defective Period o galuega a... O lea ou te vaai atu ai foi ia atonu e i ai se taimi ae le faapea o se finagalo o le Malo na fai ai, o le fautuaga lava a le Komiti o lea na tuuina mai.

Ae ou te tali atu ai se taimi lau Afioga.

FOFOGA FETALAI: Malo faafetai, a faaauau mai le saunoaga a le sui usufono mamalu.

Afioga ALIIMALEMANU MOTI MOMOEMAUSU ALOFA TUUAU: Faafetai i lau Afioga i le Minisita. Ia leaga ou te vaai atu o lea e te saina i i le Tali, o le ala lena o lou fesili atu ae ui o lea, ona lea e fai mai o le suia o lea faatulagaga i le 24 masina e mafai ona faatinoina. Ma o ni aafiaga o le a tulai mai o le a faaleleia e le kamupani konekarate, ia na o le tuualalo e pei ona taumafai atu.

O le auaunaga o vaa, le Lipoti lea 2019/2020 ma le 2020/2021 o lo o i ai le fautuaga ma ua tali foi le tatou Malo i le tulaga lea o le aveesea mai o aoga ia mo alii seila mai i lalo o le faamalumaluga a le Iunivesite o Samoa. O lea e maitau atu i le tali o se fuafuaga lelei ae o le a silasila iai le tatou Malo. A o se fesili; a aveese la le Marine lea Maritime School mai lalo o le NUS, e tumau ai pea le taua la o Tusipasi ia o le a maua e le aoga lea pe afai e aveese mai lalo o le Iunivesite? Ae mafai ona latou fund ina le latou lava ia aoga pe a faatumaoti? Ia ua na ona pau na o se fesili ma le tulaga mulimuli.

Ia ma le tulaga mulimuli i le tatou Shipping Corporations, ia o lau fesili o lea e te iloa o lena e ia te oe le tali. Aisea ua na o le \$3,000 ai na faatau ai le vaa lea o le Pasefika Express ae \$450,000 na faatau ai le Samoa Express? Le tetele o le eseese o vaa e lua e \$3000 le isi ae \$450,000 na faatau ai le isi vaa. O nai motugaafa na lau Afioga i le Minisita ia faafetai mo lo matou avanoa.

FOFOGA FETALAI: Ia faafetai, tulai mai le sui usufono mo Aleipata Itupa-i-luga.

Afioga FUAAVA SULUIMALO AMATAGA (Aleipata Itupa i Luga): E momoli atu le agaga faafetai tele i lau Afioga i le Fofoga Fetalai ua maua se avanoa o lena itumalo, e faaleo ai foi sona vaivaiga ma se faatauvaa e tusa ai foi ma Lipoti a le Komiti. O le talitonuga o le a papaaveloa o lea ua e saunoa ma momoli foi laau i Fogaa i lena taeao, e viia ai le agalelei o lo tatou Tapaau i le Lagi.

Ae o le tulaga e faamuamua atu ai se faamatalaga o le vaega lea a le LTA, o lea ua i ai Fautuaga a le Komiti ma e faamuamua ona avatu le faafetai i le Minisita, aemaise foi o le Faalapotopotoga i le tele o galuega ua ausia. A o nai mea laiti lava ia e pei o lea foi sa taua i se lauga foi a lenei itumalo, o le agai atu lava lea i tua i Aleipata. O le tulaga lea o moavao ma konekarate ia pe mafai ona tuu atu ai sina tamaitai Clause foi lele moa le tafaala i shoulders ma vaai tauluulufau ia, ua tele na masaesae ai fale tapoleni foi ia o taavale maualuluga. Aemaise a... ua laki nei taavale kiliva foi ma loli container o na e tau kiliaina tama na e fesoasoani ai i nai pasi. E fai mai ua aafia tapoleni aua e...ia e mafai a na alo i le isi itu aua o le pito lea e pipii i le mauga o na e tautau mai ai i lalo tauluulufau na. Ae a alo la i le isi itu i le pioga ae o la e sau le taavale i le itu na e tele le aafiaga, o le soifua ma le ola o le mamalu o le atunuu o lo o agai atu i tua ae pei o nai tulaga foi lele...

O le isi tulaga faamolemole o lea e i ai le tulaga lea e faapea o le moaina o vao ma alavai o auala galue, o le a taatia atu i nuu ma afioaga. Faafetai o lea ua maua atu le tulaga lea ae pei ona saunoa foi le Sui Taitai o lenei itu, e i ai auala foi lele e tai pei la o Aleipata. E ese a le coastal road ae ua iai foi inland road lea e taua e matou o le auala o le Tsunami, o le fesootaiaga la o auala galuea lea e i totonu i nei ua feoai uma ai pasi ua public foi lele ae na amata pei o se auala galue tai pei a o le mea le iai foi le itu i sisifo i le alu atu i tai o Faleasiu ua alu atu foi tau i uta i Aleisa. E pei o auala uma ia ua faaoga e le atunuu ma tulaga uma na, ae taatia pea le isi vaega lea, e agai i uta le mauga ia pei o le vaega na e tuu atu pea i afioaga. Pe a faapea o le finagalo lea o le Malo e moa ma vaavaai lelei alavai ma tulaga faapena.

E faapito sau faamatalaga i le auala lea o si o matou nuu o Vailoa i Aleipata o le auala lea na tatala tonu lava i le vaitaimi o... i le 2009 ae le i oso le Tsunami. O le vaitaimi foi lea na tatala ai le uafu lea e i Aleipata aua o mea a ia na tatala i le tausaga lea ae le i oso le Tsunami. Ia ma sa lelei a le auala lea sa alu atu gata tonu a i lalo o le aega i le mea la ua iai nei le Pe'ape'a ae le i a'e loa i luga o le mauga. E pei o si tulaga foi lele o lou iloa i le mea na ave i ai le faamuamua o i i e i ai le faleaoga a le nuu, o gauta atu e i ai tane vai a le Water Authority a o uta atu loa lea ua iai le tatou Peapea.

Sa lelei a la i le taimi lena ae na tele loa loli tetele e lau atu container ma mea ia i le faiga o nei Poloketi, e pei o ina na amata ai loa ona mavaevae ma omoomo. Ua fiu lava si o matou nuu e taumafai ia ua sosolo mai a ma le vao aua e le i toe alu atu a se faaleleiga, na ona taatia atu pea i ina faamolemole i lau Afioaga. Pe e te asiasi atu foi i ai leaga o lea e i ai aseta taua a le Malo o lo o i ai tanevai foi lele e store ai le vai i ina i le vai pamu lea e sau mai Satitua ma Lalomanu faasolo atu loa i gauta o lo o i ai le tatou Peapea lea mo le gaosia o le power.

Ae o le tulaga na o lea e... ua e saunoa i le tulaga foi lea e 12 masina ma e lagolagoina e lenei itumalo le 12 masina, e ui lava na fautua atu le Komiti i le 24 ae ou te iloa o tulaga faa-konekarate. Ou te iloa foi o le a alu ai foi i luga tau o latou tauofoga aua na e DLP po o le Defects Liability Period lea, ou te iloa a lua tausaga e tausi ai e se konekarate pe a maea ona fai se auala fou ou te iloa

e feololo foi se latou seleni e toe tuu i luga o latou tau ia ma e lagolagoina e lenei itumalo ia alu pea i le 12 masina e pei o le mea lea e i ai nei.

A toe omoomo ma toe taei ma faaletonu ua lava le...o la e lava le latou seleni na e i ai ina e faaleleia ai tulaga ia. Ona tatou omai lea i le vaega lea o le tatou Shipping o lea ua taua foi e sui usufono foi o lenei itu ia le tulaga lea o le tatou vaa lea o le Samoa Express 1. O lea sa faitau atu ai le Lipoti i tali a le Malo sa i ai le fetuunaiga ma le NUS i le latou Maritime School lea e i i Mulinuu. A o le... faapea la ua le ogatasi ma le fuafuaga ona o lea e aumai le faaupuga ua le gafatia e le Iunivesite le tulaga lea. O lea na toe tender ai loa malo le \$3,000 ae pei la o se faafesili a lenei itumalo, po o le uiga o lea mea e le gafatia e le Iunivesite le \$3000 po o se mea foi lele ua ala ai na le taunuu le fuafuaga lea. E aumai le vaa lea e amata ai ona fai ai training ma alo o le atunuu foi lele i i. E pei o le uiga lena o se faafesili. Po o le mea sa outou taumafai e donate atu ae fai mai le Iunivesite e leai se tupe e faagaoioi ai ma utu ai le kiso o le vaa. Po o le mea o le leai o se tupe e totogi ai se tou hire foi lele faapea pe \$3000 i le tausaga e hire ai le vaa e fai ai outou trainings.

O le tatou malaevaalele e faafetai lava i galuega foi ua faatinoina ma tulaga ia, o le tatou malaevaalele e na o le pau lava se fautuaga a lenei itumalo ma ua uma foi ona ou talanoa i le tamalii foi o lo o faauluulu i ai le tatou malaevaalele. Sa i ai se malaga sa ou i ai i le faaiuga o le tausaga i Fiti, ou te alu lava ou matamata foi lea i le malaevaalele a Fiti, aua e tau le compare tatou i malaevaalele a Niu Sila ma Ausetalia aemaise a totonu o falemalolo se i tulou a le Maota. O le aso foi lena na ou sau ai foi ou sau foi ou afe ai...ia ou te alu atu tele ia o le faaletonu le uiga foi lele...Ou te iloa a o konekarate ia e faia le maintenance ma mea faapena. E silafia foi a le tu tu ai lava le Pule i tafatafa ia e le tafiti foi konekarate e tidy up e fai o mea foi ia o lo o faaaoga a o le manogi o lo o to'a ai lava. O tulaga na foi lele...afai la o au o se tagata ese mai se isi atunuu o lona uiga ou te tago pue ae lafo i fafo, ia ou faapea o tulaga ia o lo o i ai le malaevaalele.

Ae pei o se tulaga lea na ona tuu atu pea o lo o i ai le aufaigaluega aemaise pe a faapea o lea e out-source ia tulaga o konekarate, tautuana ia fai se latou performance foi lele a siaki atu lava lea aso e faaletonu ia ua tipi le \$1 o le konekarate o nai mea foi ia o le faamaoni aua na foi e galulue le Pule ma le aufaigaluega. Ae tuu atu foi i e e fitoitonu ma nei matafaioi ae o atu foi tama na... tau sa'o ai lea o upu a toeaiina i aso ia a augata lava e fai maumaga e amoamo atu lava le peaato tuu i lalo o le gatae i le paolo, ia good morning plantation. Toe ala ane toe amo le ato i tai, ia good afternoon ae leai ma ni talo o ave ai. Ia, o le fesoasoani atu lena a lenei itumalo ma le agaga faaaloalo. Faafetai.

FOFOGA FETALAI: Faafetai, malo. Tulai mai le sui usufono mo Vaimauga 2, o le tatou toe sui foi lea.

Tofa LENATAI VICTOR FAAFOI TAMAPUA (Vaimauga 2): Faamalo faafetai i lau Afioga i le Fofoga o le Maota e tusa ai foi ma le avanoa. E manatu

o le a alu loa se sao foi o lenei itumalo e tusa ai foi ma Lipoti Faaletausaga pei ona folasia i le tatou Maota Fono i lenei taeao.

E lua lava Lipoti e fia agai atu ai se manatu o lenei sui usufono lau Afioga i le Fofoga o le Maota ae muamua ona fia faaleo le faafetai i le Susuga i le Taitaifono, Sui Taitaifono aemaise foi le mamalu o le Komiti e tusa ai foi o le latou galuega. Faafetai foi i le Afioga i le Minisita ma le Kapeneta i le Tali foi a le tatou Malo i fautuaga pei ona tuuina mai.

A o se leo o lenei itumalo lau Afioga o se vaega e fia faaopoopo i le tulaga lea o alavai ona o se vaega e taua o lo o faapena ona molimauina foi e lou nei sui usufono. E le gata i... aemaise lava i totonu o si ou itumalo. E ese le taua o le vaega lea, ia e pei ua sao ai lava le fautuaga lea e aumai e pei ua vaiti ai le auala ua leai se avanoa e savali ai le tagata i autafa o le alatele ae na o le avanoa e o ai taavale e lua. A fai foi le alavai o le mea moni lau Afioga, o mea o lo o molimauina e lou nei sui usufono i totonu lava o le matou itumalo, a agai mai taavale e lua i luga o le alatele, e pau lava le alofaga o le tagata savali o le oso i le omo, se i tulou, po o le alavai e sefe mai ai. Ia, ona ita lea o le tagata lea i le avetaavale ae galo ia te ia o lo o taumafai foi le avetaavale e alo mai le isi taavale o lo o faapena ona feoi i luga o le alatele. E pei o tulaga ia lau Afioga e ese le taua o se tasi o polokalame, le faamuamua foi sa ave i le nuu lea o Vaivase-uta i totonu o si o matou Itumalo. O le fautuaga a le Komiti lenei, o le leai o se avanoa e savavali ai tagata savavali i le alatele.

O le faamuamua sa ave i Vaivase-uta lau Afioga i le Fofoga Fetalai i le latou foi seleni lea sa maua mai i le miliona muamua, sa faapena ona ave le latou faamuamua e fai se auala savali i luga o le alavai. O lo o taatia i le taimi lenei. O la ua amata le galuega ia ae paga lea e fai lava sina taugata, e talitonu foi o la e ua faaoo atu le talosaga a le nuu aemaise foi le Ofisa o le Itumalo i le tatou Ofisa o le LTA mo se fesoasoani. Aua sa fesoasoani mai lava le LTA mai le amataga o lea Poloketi ae o le taimi nei la ua amata, pe ua lata i le 30 mita la ua mafai ona fai. E fai lava le auala savali i luga o le alavai ona e vaiti lava ia le auala i le agai lea i uta ma le agai mai tai.

O se initiative e ese le taua lau Afioga. O lea ua tauave e le afioaga o Vaivase-uta. A o le talosaga i lau Afioga i le Minisita ma le tatou Ofisa, faamolemole e fia maua se fesoasoani ina ia maea lelei ai lea galuega taua ma se galuega lelei mo lea afioaga i Vaivase-uta.

Lau Afioga o le isi vaega e fia oo atu ai se faamatalaga a lou nei sui usufono, o le tulaga i konekarate moavao. O le lua tausaga talu ai sa aafia ai foi lou nei tagata, o au sa avea le taavale fiti mai lava le maa, sei tulou, ia ona isi ai lea o le tioata o le taavale. Ae mo le silafia e le tele ni finauga sa mafai ona fai ona o le tulaga faigata o le taumafai e faaoo mai i le Tulafono. Ia ae sa oo lava lou nei tagata e toe faatau le tioata fou, e lata i le \$900.00. O le mea lea e ese le taua o le fautuaga lea, poo a ni aiaiga e mafai ona faataatia e mulimulitai ai foi Konekarate ia aua foi le moaina o le vao i tafa o le alatele.

O lo o aumai le isi fautuaga e ese le taua foi lau Afioga i le tulaga lea o loli tetele o lo o tosoina ai masini tetele ia pei o excavators pei ona taua mai, aemaise foi le tulaga ia o container. E ese le taua o le vaega lea, e manaomia ni taavale pito i luma ma le pito i tua, ni faailoilo ma tulaga faapena. A o se

tuualalo a lou nei sui usufono ona o lo o faapena ona vaaia pea i lea aso ma lea aso aemaise le agai mai lea i Malifa seia oo i Vaitele. O le a se fuafuaga a le tatou Ofisa aemaise foi le Afioga i le Minisita, pe tatau ona fai ni aiaiga, taavale tetele ia pei e sili le faaaoga e latou le lane lea e pito i fafo. Ae aua le omai i le lane lea e i totonu, faaaoga pea le lane lea i totonu ia vave ai lava... ia flow ai lava le traffic ae omai loli tetele ia e faaaoga le lane lea i fafo e agai ai latou galuega faatino i lea aso ma lea aso. Pei o se tulaga lena o lo o vaaia pea i luga o le alatele, ese le faigata, e lua loli tetele o le isi lea e pito i fafo o le isi lea e pito i luma ae ua poloka ai le auala. Ae le gata i lea ua le iloa atu e le taavale lea e pito i tua luma atu po o a foi ni mea o tutupu mai ai. Aemaise taimi ia ua molimauina foi e lou nei tagata ina ua i ai taavale foi ia fesoasoani muamua, tatou ambulance pe a i ai ni... taimi foi ia i luga o le aualatele ua sau le atoa ia ua leiloa e avetaavale poo fea o le a alo iai. Ae lelei foi lava le sau o se awareness a le tatou ofisa, a iai ni mea faapea e tupu i luga o le aualatele, faamolemole faatafa i le itu agavale pe a faapea o le tulaga lea e tatau ona i ai. Aua ua ou vaaia e faatafa isi taavale i le itu agavale ae faatafa isi taavale i le itu taumatau a o la e agai mai taavale i le isi itu. E pei o le tulaga lena lea ua le mautonu ai foi ia nisi o avetaavale. Ae pei o nai fautuaga ia e faaopoopo atu ai i mea o lo o faapena ona aumai i totonu o le tatou Lipoti lau Afioga i le Fofoga o le tatou Maota.

Lau Afioga i le Minisita, e tasi lava se tuualalo ona o mea o lo o maitauina foi e lou nei sui usufono. O le a se finagalo, ia o le vaai lava ia faale-tagata a lou nei tagata o le mea e tatau ona fai, ae le o i ai se tomai ia te au. Ona o lea ua tatou tulata foi i le fonotaga tele lea a Taitai o Malo o Atunuu o le Taupulega, i le magafa lea i i Matautu agai i le Apia Park ma le agai mai Apia ma le agai lea i uta i Faatoia ma Vaipuna ma Vaiala. Pe mafai ona fai se tatou Feasibility Study, pe le o talafeagai lenei taimi e fai ai ni traffic lights i le vaega lea. Ona e maitauina lava e lou nei sui usufono, pe faa-5 pe faa-7 i le aso lea ou te ui atu i le auala lea e fai lava sina vevesi o taavale ma poloka, ia e ono aafia... Faafetai o lo o iai le tatou vaega o le traffic o Leoleo ia e tele ina fesoasoani mai ai i luma i ina e faasinoino tatou taavale i lea taimi ma lea taimi.

Ia pei o se taumafaiga atu lea a lou nei sui usufono lau Afioga i le Fofoga Fetalai, ia agalelei le Atua i taualumaga o le tatou fonu. Faafetai.

FOFOGA FETALAI: Tulai mai le sui usufono...

Susuga Hon Tuilaepa Fatialofa Auelua Sailele Malielegaoi: Na ona ou fesili atu lava...

FOFOGA FETALAI: Ia tulai mai lau...

Susuga Hon Tuilaepa Fatialofa Auelua Sailele Malielegaoi: E mafai lava ona ou faafesili atu, o lea o lo o ave poloka le faatalanoaga? O lea la ou te maitau pei e tolu Lipoti ia e faatalanoa ae o au lea ou te fia lauga i le tulaga lea o le vaega lea o le Lipoti faatatau i le vaalele ona e taua tele le mataupu lea ou te le i lauga ai. Pe mafai la ona...

Tofa Hon Olo Fiti Afoa Vaai: Lau Afioga...

Susuga Hon Tuilaepa Fatialofa Auelua Sailele Malielegaoi: Matou agai atu i isi Lipoti ia leaga o lea ua taaofai uma i lauga a isi a o lea... na o isi Lipoti ae toe lava o le vaalele lea ou te fia talanoa i ai.

Tofa Hon Olo Fiti Afoa Vaai: Lau Afioga i le Fofoga Fetalai, faafetai mo le avanoa. Masalo o le manino ia i luga o tatou Pepa o Galuega le lisi o Lipoti ia e faatalanoaina. A o lea la ua toe finagalo le Taitai o le Itu Agai e toe agai i tua, ia aua o le mea o lea e manino o lea e silafia uma lava e le Maota e 9 Lipoti ia a o lea e saunoa mai na o le 2 ea pe 3.

Lau Afioga e le tatau ona tatou toe foi i tua a ua i ai lava le tagata e alu i luma alu i tua a o tatou galuega a le Palemene e le toe foi i tua.

FOFOGA FETALAI: Ua lelei o lea ua maua le finagalo o le Taitai o le Itu Agai, o lea ua maua lelei atu lava e le Nofoa. Ae talu ai e tasi lea vaega sa oo i ai le feiloaiga a le Taitai o le Maota ma lau Afioga i le Taitai o le Itu Agai ma au nei ona se auala foi lele ina faigofie ai i le silasila, o le ala foi lea o lea e lisi atoa atu ai lava Lipoti. A outou faafogafoga mai foi, e tiga lava le tele ae ou te taumafai lava e faitau taitasi atu ina ia lagonaina ma maitau mai e outou sui usufono mamalu. O le itu lene lea sa lagona ai le fiafia ia ma avatu foi lau faafetai i lau Afioga ma le Taitai o le Maota i lea faiga e ese foi le atamai. Ae a tatou toe o nei i le mea lea ua e talosaga mai ai, ia ua ou iloa la ua fai si faigata o le tatou mataupu ma o lona uiga e toe foi uma lava i tua.

Susuga Hon Tuilaepa Fatialofa Auelua Sailele Malielegaoi: Lau Afioga ou te le o foi i tua, ae le mafai ona alu atu i se tamai taimi lava manatu i Lipoti uma. Aua o lou taofi sa ou manatu e tatou te faasolo i Lipoti, tasi le lipoti uma tatou se'e atu i le isi. A o le mea la lea ua tupu ua tai-3, tai-4 Lipoti e alu i le taimi e tasi. E le lelei la i le faalogologo mai a le Malo ae le avatua ni a matou fautuaga aua e taua tele fautuaga ia e avatu.

Tofa Hon Olo Fiti Afoa Vaai: Lau Afioga i le Fofoga Fetalai...

FOFOGA FETALAI: Se i tulai mai lau Afioga i le Minisita.

Tofa Hon Olo Fiti Afoa Vaai: Sa ou fesiligia foi le Afioga i le Tamaitai Palemia, ou te iloa foi sa i ai lau Afioga i totonu o le tou Komiti lea. E leai lava ma se isi o lau Afioga ma le Tamaitai Palemia na manao e fai faapea, na o le Taitai lava o le Itu Agai na manao e sau atoa faapea le mea lea, a o lea ua toe tete'e.

FOFOGA FETALAI: Ua i ai le manatu o le a maua se faaiuga a le Fofoga Fetalai pe a tatou taliu mai le tatou malologa.

Na faataatiaese Taualumaga a le Fono Aoao Faitulafono mo lana malologa masani i le itula e 10:49 i le taeao ma toe faaauau i le itula e 11:26 i le taeao.

FOFOGA FETALAI: Ou te faasilasila atu ua toe amatalia nei Taualumaga a le Fono Aoao Faitulafono.

I le toe talii mai ai o le malologa, e i ai le manatu ua maea le tautege ma le taligasua sa alo atu i ai le paia o le Palemene, ua maua foi le malosi mo le faaauauina o le tatou galuega. Faafetai i le Atua i Lana foai.

E faataatiaese Taualumaga mo le malologa o lo o tulai mai le Taitai o le Itu Agai mo se avanoa faalua e toe fia saunoa ai. U i ai le manatu o le Nofoa o le a toe toso le tatou galuega, ae amanaia tele e le Fofoga Fetalai le tatalo mai mo avanoa e faasoa ai finagalo mo tonufai o le atunuu.

O le mea lea, ou te talosaga atu i lau Afioga i le Taitai o le Itu Agai taoto mai lou finagalo, o le a maua avanoa i taimi e tali ai le Malo ona avanoa lea o le mataupu taua o lo o e tatalo mai ai mo se avanoa, ona o nei lava avanoa e taumafai lava ina ia faagasolo le tatou galuega e pei ona tatou sau ai. E tai pei foi o le aso ananafi, e 5 Lipoti a le Afioga i le Tamaitai Palemia, o lea lava sa talanoaina i le taimi e tasi, na manaia lava le faagasologa o le tatou galuega. O le mea lea ia atonu e aoga foi le faatulai mai o lenei mataupu e silafia uma ai e le tatou Maota le faagasologa o le tatou galuega e tusa ma le amataga mai lenei vaiaso i le faatinoina o tatou feau. O le mea lea malo faafetai mo finagalo faaalii. Masalo ua maea sui usufono sa saunoa i Lipoti a le Komiti ma Tali a le Malo.

Ou te tapa lau Afioga i le Taitaifono e talifuaitau i saunoaga a sui usufono mamalu.

Afioga FEPULEAI FAASAVALU FAIMATA SUA: Faafetai i lau Afioga i le Fofoga Fetalai. E momoli foi le agaga faafetai i le Matagaluega mo le tausiga o le fono, ua saoi le taligasua a le Afioga i le Taitai o le Malo, le mamalu o le Kapeneta, ae le gata foi i lea o Minisita Lagolago, Afioga i le Taitai o le Itu Agai ma lea itu o le Maota ma sui usufono mamalu uma o le Palemene. E le gata foi i lea o Ofisa Sili o Pulega o Matagaluega ua mafai ona tatou faatasi ma le mamalu o Samoa Aoao ua molimauina lenei fonotaga.

Faafetai i lau Afioga i le Fofoga Fetalai mo le avanoa o lea ua tuuina mai mo lenei Komiti, e fai ai lou leo e fai ma sui o le Komiti e faaleo ni Tali e tusa ai foi ma ni faafesili.

I le maitau i Lipoti e iva (9) e pei ona lauiliuina i lenei aso, na o le toalima i latou po o sui usufono mamalu na mafai ona faaleo finagalo ma aumai foi ni faafesili. O lenei aotelega, o le tele lava o fautuaga agai le Komiti ma le Malo aua foi mataupu na laga ma fautuaga a le Komiti i le Malo aua le agai i luma o galuega fai a le tatou Malo. Ae o le a ou tali atu i nai fesili ua faamauina e agai mai le matou Komiti.

O le tulaga o saunoaga a le Afioga i le Taitai o le Itu Agai, o lea ua maitauina ma silasila foi le Maota i galuega faatino a le Matagaluega o Galuega Tetele po o le LTA, lea ua faailoa mai ai o galuega faatino e 11 Upolu ae 9 Savaii, lona

uiga e 20. O galuega laiti po o le faaleleia o vaega laiti o galuega, o le aofaiga e 38. E 26 Upolu ae 12 Salafai. O le fesili e tele lava ina maitauina pe aisea ua tele ai galuega i lea foi vaitau i le Tala Faaletupe po o le taimi foi o le Nofoaiga, o lo o i ai i lalo i le pito lava i lalo o le Itulau 5 o le tatou Lipoti 2020/2021 o lo o i ai le Tali i le Itulau 6 i le Lipoti a le Suetusi, lena o lo o avatu ai i lalo ifo o le 4(2.5). O le tele o ia galuega o lo o i ai tupe pau sa tau topetope i lena taimi ona o le latalata i le taimi o le faiga palota a le atunuu. Ae o le taua foi lea o le tali atu i le faafesili a le Sui Taitai o le Itu Agai, i le tupe pau lea sa faailoa mai, e faamalulu atu ua sasi po ua misi foi le taina, ae o lo o faamalamalama ma faamanino mai le Lipoti o le 2020/2021 le tupe pau lena e i ai, i le 2019/2020, 2020/2021. Ia e maitau foi le tatou Maota sa feagai lena taimi ma le faamai, sa tele lava manaomiaga, o le ala lena o le tele o le faaletonu lena sa i ai foi le fesoasoani a le Malo mo a tatou tupe alu ma tupe maua i le tatou Matagaluega.

O le tulaga i le fauina o alavai, o le tele lava o sui usufono sa saunoa, e aumai lava fautuaga e tusa ma fautuaga a le Komiti i alavai. E eseese lava fausaga o alavai. Ua maitauina foi e le Komiti i galuega faatino a konekarate i tua i afioaga, pei e tasi lea mafuaaga e mafua mai ona o totonu o afioaga. Ua le mafai ona toe aveese pa tulou a nai aiga, ua laitiiti le ogaeleele e alu ai le auala, o le faafaigata foi lena ona faatino e konekarate alavai ina ia lelei le tafega o le vai pe a oo ina louloua le tau. Ia pei o le tulaga lena i le maitau a le Komiti, e le o tutusa fausaga o auala, a o le tali mai lea, ua faigata ona toe faalautele auala, ona pau lava o se mea ua faataga mai e afioaga ma aiga e kolosi ai le auala lea.

O le teuina foi o aualagalua i totonu o afioaga ma nuu, o le a le afea lava le auala autu o le Malo, ona o lo o i lalo lava o le polokalame e faatino e konekarate e moaina le vao tulaga faapena. Ae i le maitau a le Komiti, o le tele lava o taimi matou te vaavaai ai ma matou faalogologo i taimi e tatala ai e le Afioga i le Minisita aualagalua, o le tele lava o ana saunoaga e tuualalo ai i afioaga, pulega a alii ma faipule e galulue faatasi ina ia mafai ona latou teuina tafaala, alavai ma tulaga i aualagalua ina ia faatumauina pea le lelei atili. Peitai i le matou asiasiga, e i ai lava afioaga ma alaafaga o lo o galulue faatasi, e i ai foi afioaga e le o faatinoina lea tulaga i le teuina o alavai ma tafaala.

Ia o le taua foi o lenei fonotaga e faafofoga mai, tatou galulue faatasi, o lea ua uma ona fai le pitolaau a le Malo o le fai o le aualagalua, ae tuu atu loa i le pitolaau a tatou afioaga ma nuu, tulou foi le gagana, tatou galulue faatasi e tusa ma le teuteuina ma le faamautuina ma le faaleleia atili o meatotino a le tatou Malo.

Ona oo mai lea i le tulaga lea pei ona i ai foi le saunoaga a le sui usufono i taimi o fonotaga a le Komiti, o lea ou te fiu e autilo po o fea o le Lipoti o i ai se 1 se itula. Pau le mea lea e i ai e 1 le aso ae 4 itula. Masalo leaga o faamaumauga, leaga a tasi le itula e foliga mai ua faimea talapelo le Komiti. E faamalulu atu i le fono, lau Afioga i le Fofoga Fetalai ma le mamalu o le Palemene ona o le tulaga lena o lo o...

Afioga Aliimalemanu Moti Momoemausu Alofa Tuuau: Lau Afioga i le Fofoga Fetalai...

FOFOGA FETALAI: Malie lau Afioga i le Taitaifono ona o lea sa laga e le sui usufono mamalu, tulai mai le Sui Usufono Tamaitai mai Alataua Sisifo.

Afioga Aliimalemanu Moti Momoemausu Alofa Tuuau: Ia, a tagai lava lau Afioga i le Taitaifono i la outou Lipoti lea o le tausaga faaletupe 2020/2021 i le LTA. Itula Fono – 1 le itula. Ia ma le faaaloalo.

FOFOGA FETALAI: Tulai mai le Sui Taitai o le Itu Agai.

Tofa Hon Lauofo Fonotoe Nuafesili Pierre Lauofo: Lau Afioga i le Fofoga Fetalai, faafetai mo le avanoa. Lau Afioga i le Taitaifono, o le mataupu lea sa ou laga, o le tou Lipoti lea e aumai le table lea e aumai mo mea o polofiti o tupe maua ma tupe faaalu. I le Lipoti Faaletausaga a le LTA 2019/2020, o lea e aumai ai o le tupe faasili po o le polofiti, e \$1,355,897. Itulau 5 Gagana Samoa. O le Lipoti e sosoo ai i le tausaga faaletupe e sosoo ai, o lea e aumai i le tou Lipoti, tupe pau. O le tausaga 2019/2020 e \$1,355,897. Faatali o lea e le i uma.

O le fesili; e mafua ona ou fesili, e le mafai ona tupe mama i le polofiti i le isi tausaga le tupe lava lea e tasi ae sau le Lipoti i le tausaga na sosoo ai fai mai o le tupe pau. O le mafuaaga lena na ou fesili ai, po o i ai sou finagalo, po o le a le faamalamalama, ae o i ai sou finagalo, e faatulai se faasaoga po o se teuteuga i tou Lipoti. Ae afai e leai, ia tatou o ai faapea.

FOFOGA FETALAI: Tulai mai lau Afioga i le Taitaifono.

Afioga FEPULEAI FAASAVALU FAIMATA SUA: Faafetai mo le avanoa.

FOFOGA FETALAI: Malie lau Afioga i le Taitaifono... Faasaleleaga 5 e te le i lauga i le Lipoti.

Afioga Peseta Vaifou Tevagaena (Faasaleleaga 5): Faafetai i lau Afioga i le Fofoga Fetalai. Ua ou tulai atu ona o au o le sui usufono o le Komiti ina ia manino ma malamalama le tulaga lea e fesiligia foi e le Sui Usufono Tamaitai. I le Lipoti lea e aumai i le tulaga lea o le 1 o le itula, o la e sao lelei lava le saunoaga a le Taitaifono, o le 1 lena o le itula i le Matagaluega e tasi, aua o le Komiti lenei e tele Matagaluega e i ai. E tai-1 lava la itula e fesiligia ai lea Faalapotopotoga ma lea Faalapotopotoga, ae afai e 4 itula, lona uiga e 4 Faalapotopotoga.

Ma lou faaaloalo lava ina ia manino ma malamalama le tulaga lea.

Afioga Sulamanaia Fetaiai Tauiliili Tuivasa (Vaimauga 1): Lau Afioga i le Fofoga Fetalai, mo le faasaoina o le taimi.

FOFOGA FETALAI: Ia o lea la ua manino atoatoa le tulaga lea. Faafetai i lau Afioga i le sui usufono mamalu o le Komiti.
Vaimauga 1.

Afioga Sulamanaia Fetaiai Tauilili Tuivasa: Ia o le isi sui usufono sinia lea o le Komiti. Lau Afioga i le Fofoga Fetalai o se mea e fia faasao i le saunoaga a le Sui Taitai o le Itu lenei, ona o lea e saunoa i le table lea, ae a outou silasila a i ai i le table 5 lena i le faa-Samoa, o tupe maua, aveese faaalu lena e maua ai tupe na e i luga. E pei o le faasaoga lena. E le o sese la le polofiti, aua a toe oo foi la i le faapapalagi, pe a faapea lava o lau susuga foi o le loia, ia e faapena lava le faiga. A revenue less expenses ona tulai loa lea o le profit or loss. E le o mafai la ona i ai. E pei la o le agaga lena i le tulaga, \$14 miliona aveese le \$8 miliona i le 2018... i le 2019 tulai mai loa le polofiti lena e \$6 miliona. O le 2019/2020, e \$6 miliona le tupe na maua, toese le \$8 miliona, ia fa loa i le niupa lena e i ai le loss lena e \$1.8 million ona ua tele tupe faaalu i tupe maua.

E pei o se faasaoga lena, o lea lava e sao faamaumauga, e mafai ona lua itu e te silasila i ai pe a...

Tofa Hon Laufo Fonotoe Nuafesili Pierre Laufo: Faafetai i lau Afioga i le Fofoga Fetalai ona o lea ou te vaai atu...

FOFOGA FETALAI: Ua a ua malie lou finagalo?

Tofa Hon Laufo Fonotoe Nuafesili Pierre Laufo: Leai, e matua sese lava le mea lea na saunoa ai le sui usufono lea, ua atili ai ona sese ona o le faafofoga lelei mai. Tago i le Lipoti lena o le tausaga e sosoo ai i le table lava lena i le itulau e 5, e 2 Lipoti. O le Lipoti lea a outou o le 2019/2020 lena e aumai ai le polofiti i le tausaga faaletupe 2019/2020, e \$1,355,897. Silasila ae loa la i le Lipoti o le tausaga faaletupe lena e sosoo ai 2020/2021, vaai le table i le itulau e 5, o lena foi ua toe aumai ai le fuainumera lea sii mai le tausaga ua tuanai atu 2019/2020 le numera lava lea o le vaegatupe lea e \$1,355,897 a o lena ua tau mai o le tupe pau, ae sa tau o le polofiti i le tausaga ua tuanai.

Fai ma faitau ane i isi Lipoti, ae aua e te faitau na o le Lipoti lea e tasi ona malamalama ai lea. A o la e foi la e tulai mai le Taitaifono, e le o malamalama foi ia. Faaopopo nisi itula o le tou galuega ona outou malamalama ai lea.

FOFOGA FETALAI: Tulai mai lau Afioga i le Taitaifono.

Afioga FEPULEAI FAASAVALU FAIMATA SUA: Faafetai mo le avanoa. E malamalama lava pe a faitau uma le Lipoti. Silasila i le Lipoti lea e talanoa ai le 2019/2020 lea e talanoa ai i lalo o le itulau e 5 faa-Samoa i lalo o le table lena e i ai, Nu.5, luitau na feagai ma le pulega. Pei la o lena e sau ai i ina...

Tofa Hon Laufo Fonotoe Nuafesili Pierre Laufo: Lau Afioga i le Fofoga Fetalai, ou te le o talanoa i luitau, ou te matua malamalama i luitau i galuega na faatino. A o le table lea ou te talanoa atu ai, pe e te finagalo e faatu se lafo e faasao lau table pe afai e sao au e sese. Ae afai e leai... A o le faaogaina o le seleni, o lea ou te malamalama. Faafetai.

Afioga FEPULEAI FAASAVALU FAIMATA SUA: Faamolemole e onosai mai o lea o le a faamalamalama atu.

FOFOGA FETALAI: E lelei lau Afioga i le Taitaifono, o le fesili lena o lea e fia malamalama ai le Sui Taitai foi ma le Maota, ona o lea e tutusa lelei lava figures o le Lipoti lea ma figures o le Lipoti lea.

Afioga FEPULEAI FAASAVALU FAIMATA SUA: Ia o lea o le a taumafai atu lau Afioga.

FOFOGA FETALAI: Ia se i sau.

Afioga FEPULEAI FAASAVALU FAIMATA SUA: O le tulaga lea ou te faailoa atu o le tulaga tau tupe a le Pulega na faamauina i le aso 30 Iuni, o se faaletonu \$1.3 miliona, lena la lea e saunoa mai ai le Sui Taitaifono. Ona o Tupe Faameaalofa a le Malo i lalo ifo o Tupe Faaalu i luga o auala ua faamaonia.

O'o mai loa i le Lipoti 2020/2021 i le table lava lea, i lalo ane o le kalafi lea, i le faaiuga o le tausaga 2021 na faamauina ai le tupe pa'u. Lea la ua faailoa atu o le tupe pa'u, a o lea foi na faailoa mai i le table lea sa ou ta'uina atu le faaletonu o le \$1.3 miliona. O le uiga o le faaletonu, o le tupe pa'u.

FOFOGA FETALAI: O lona uiga la o lea e sao lava ia figures ia?

Afioga FEPULEAI FAASAVALU FAIMATA SUA: O lea e sao lava luga. Ae pau le mea o lena e tusi mai le polofiti a o lo o faamalamalama atu i lalo ane o le kalafi lea le \$1.3 miliona o le tupe ua faaletonu ia po o le tupe pa'u lau Afioga.

FOFOGA FETALAI: Ia, tatou malilie o lea lava ua saunoa le Taitaifono e le mafai foi ona sili atu... e lava le taimi o le Taitaifono ma le Komiti sa silasila ai i ia tulaga. E faamalie atu ai i lau Afioga i le Sui Taitai o le Itu Agai, faaauau le saunoaga.

Afioga FEPULEAI FAASAVALU FAIMATA SUA: Faafetai mo le avanoa. Ou te iloa o le tele lava o saunoaga o...

Afioga Hon Fiamē Naomi Mataafa (Palemia): Lau Afioga i le Fofoga Fetalai...

FOFOGA FETALAI: Malie lau Afioga i le Taitaifono, se i tulai mai lau Afioga i le Tamaitai Palemia.

Afioga FEPULEAI FAASAVALU FAIMATA SUA: Faafetai.

Afioga Hon Fiame Naomi Mataafa: E taua foi le tatou mataupu lea e felafolafoai ai aua e pei o lea faatoa maua lea o le avanoa tatou te auiliili tele ai a tatou Lipoti o lo o galulue ai a tatou Taitaifono ma Komiti.

O au la lea ou te tau tuliloa atu le mataupu lea pei o lea ua ou vaai atu, pei o lea o le a aumai le faamatalaga, o le faauigaina. A o upu, tupe mama po o tupe polofiti po o tupe gau, mea na e lua. Ou te le iloa la po o le a tonu la le sao po o le mea e gau po o le mea o la e lelei. A fuafua atu la i le faauigaina o faamatalaga. Pe sao la lau faauigaina, e gau. Na gau i le isi tausaga muamua e gau foi i le tausaga lona lua. E leai la se uiga o lea upu o le tupe polofiti, it doesn't make sense. Po o le mea la lea ua tatou o i le faauigaina o faamaumauga ia e i ai.

FOFOGA FETALAI: Tulai mai lau Afioga i le Minisita pe tau maua mai ai se fesoasoani.

Tofa Hon OLO FITI AFOA VAAI: Faatoa ou tau mai se Taitai ma se Sui Taitai ua vaivai tele. O le 2019/2020 ma le 2020/2021 lau Afioga, e le natia o le taimi tonu lava lena ua vevela tatou campaign i le Faiga Palota, le alu o le galuega a le LTA i lena taimi. O le mea lena na gau ai, o le faiga campaign lea na fai i le 2020/2021, ia e le tau faamatala lena mea.

Tofa Hon Lauofo Fonotoe Nuafesili Pierre Lauofo: Lau Afioga i le Fofoga Fetalai o lea lava e manino le Lipoti, o lea foi ou te malamalama i le mafuaaga...

FOFOGA FETALAI: Ia, se i tulai mai le...

Tofa Hon Lauofo Fonotoe Nuafesili Pierre Lauofo: A lea e aumai i i le faaaluga o le tupe, e i ai la si vaegatupe lena na sili laitiiti ai...

Tofa Hon OLO FITI AFOA VAAI: Lau Afioga i le Fofoga Fetalai...

FOFOGA FETALAI: Ia..

Tofa Hon Lauofo Fonotoe Nuafesili Pierre Lauofo: A o upu, lea e sao le saunoaga a le Palemia, o upu ia la e alu atu i le uiga o lau fesili..

Tofa Hon OLO AFOA FITI VAAI: Se i vaai i ai o lea e le i avatua i ai se faatagaga e tulai mai ai.

FOFOGA FETALAI: O lea ua manino, taatia mai. Ia se i saunoa mai.

Tofa Hon OLO FITI AFOA VAAI: Ia e pei o le tulaga lena lau Afioga i le Fofoga Fetalai ua ou tulai atu ai e tau faamanino, e malamalama lava. Ae tuu ia lea mataupu e tau fai nenefu uma le Taitaifono ma le Sui Taitai o le Itu Agai i

le mataupu leni. Ae pei o le ala lena ua ou tulai atu ai tatou faagasolo i se isi fautuaga.

FOFOGA FETALAI: Tulai mai lau Afioga i le Taitaifono.
Tulai mai lau Afioga i le Minisita mo Faatoaga.

Susuga Hon Laauli Leuatea Polataivao Fosi: Ioe, malie lava lau Afioga, e tau maitauina foi o le a amata foi on siisii le tatou Maota ona o le tulaga lea sa e saunoa i ai i le taeao, leaga e le i auai le Sui Taitai o le la itu i lau folasaga na fai. O le tu sasa'e a'e lava i luga alu faasoloatoa lea e le i avatua se avanoa. E a pe a se i tuu le avanoa se i tali le Taitaifono? O le mea lea e tupu ai le vevesi o tatou fonon o le tu a'e lava alu i le atoa, ae le se i ave le avanoa se i faamatala. O lea foi e taumafai atu le Minisita, ia ae tu a'e lava i luga alu i le atoa ia. Faamolemole lau Afioga leaga o lea ua matou nofouta uma i lau faatonuga na aumai. Ae se i fai ifo sau faasilasilaga leaga o lea faatoa sau i le Fono.

Tofa Hon Lauofo Fonotoe Nuafesili Pierre Lauofo: Oi sole...

FOFOGA FETALAI: Ia lelei, o le...

Tofa Hon Lauofo Fonotoe Nuafesili Pierre Lauofo: Lau Afioga i le Fofoga Fetalai leaga e fai si matuia o saunoaga a le Minisita.

FOFOGA FETALAI: Se i alaala mai i lalo se i fai atu le tala lea a le Nofoa.

Tofa Hon Lauofo Fonotoe Nuafesili Pierre Lauofo: Na e silafia lelei lena sa avatu la'u faanoi.

FOFOGA FETALAI: Alaala mai i lalo se i faiatu le tala lea a le Nofoa.

Tofa Hon Lauofo Fonotoe Nuafesili Pierre Lauofo: Ia faafetai.

FOFOGA FETALAI: E masalo e te le i ai i le taeao, sa faasilasila i le taeao le tulaga lea, o le manatu lava i le mamalu o tatou fonon. O le tulaga lena, e avatu pea le lapataiga ma se tala a le Nofoa ina ia faapena ona faautagia le tulaga o tatou fonotaga ma taualumaga o le tatou fonon. Ua mafua ona ou le fai atua se tala ona o lea ua feteenai ma lua taufai tutu ma le Minisita i le taimi e tasi, ia o le mafuaaga lena lea ua ou manatu ai, ia aua le toe tulai mai ae faanoi muamua mai i le Nofoa. Ua toe tuu atu le avanoa i lau Afioga i le Sui Taitai ae aua le toe faia.

Tulai mai lau Afioga i le Taitaifono.

Afioga FEPULEAI FAASAVALU FAIMATA SUA: Faafetai mo le avanoa. E taua foi mataupu tau tupe tatou te toe asiasi agai i ai i le tau faamalamalamaina o tupe gau ma tupe mama. O le tulaga sao lena ua faailoa atu, o le tupe gau. Ona o lea ua saunoa le Afioga i le Minisita ia ona o lea foi e faailoa atu i le

Lipoti a lenei Komiti i le itulau e 5, 2020/2021 le mafuaaga na ala ai ona tele se tupe gau. O le taimi lea a o faasauni ai mo Faiga Palota lea e i ai le tupe tele lena e i ai i taimi foi o le Paketi a le Malo.

Ona faasolo mai lea i le isi mataupu, saunoa le sui usufono Tina i le tulaga lea...

Susuga Hon Tuilaepa Fatialofa Auelua Sailele Malielegaoi: Lau Afioga i le Fofoga Fetalai.

FOFOGA FETALAI: Malie lau Afioga i le Taitaifono, se i tuu atu le avanoa. Se i saunoa mai lau Afioga i le Taitai o le Itu Agai.

Susuga Hon Tuilaepa Fatialofa Auelua Sailele Malielegaoi: E manatu ua tele ina vevesi tatou ona o le talanoa i ia mea, na pau lava o le gagana o lo o tatou faaaogaina. O le Malo e le o se pisinisi, o mea na a kamupani, e tau o tupe gau ma tupe mama. A o le mea moni lava a oo mai loa i le Malo, o le faasaoga o le mea lea o le tulaga ua sili atu ai tupe alu nai lo tupe na fuafua aua e le faapea o gau o la e fai ai atinae. E gau la se Malo i se atinae, o la e faatino i fuafuaga? O le mea moni o le tele o atunuu e taumafai ia tele ni atinae e fai. O lau upu lea na fai i le isi fono, ua tau mai nei e \$25 miliona le tupe faasili o lo o totoe, e leai se aoga o lena faauigaina. O lona uiga e \$25 miliona o atinae na manao le atunuu e fai ae ua le faia. Aisea? O le tulaga lena e tatau ona tatou manatunatu i ai.

FOFOGA FETALAI: Ia.

Susuga Hon Tuilaepa Fatialofa Auelua Sailele Malielegaoi: E le o se pisinisi le mea a le Malo, e le talanoa i ni tupe mama e le talanoa i ni tupe pau. Ae tatou talanoa i tupe na alu i atinae ia ma tupe ua faasili ai po o ua laitiiti ai le faatino nai lo tupe na fuafua.

Lau Afioga i le Fofoga Fetalai ou te nofo lava ma lou ma...

FOFOGA FETALAI: Ia, lea ua maua...

Susuga Hon Tuilaepa Fatialofa Auelua Sailele Malielegaoi: Matamuli i nei mea ma tatou talanoa i tupe mama ma tupe pa'u. Pau ifea?

FOFOGA FETALAI: Ia.

Susuga Hon Tuilaepa Fatialofa Auelua Sailele Malielegaoi: O fea le mea o pau i ai?

FOFOGA FETALAI: O lea ua maua le finagalo o lau Afioga.

Susuga Hon Tuilaepa Fatialofa Auelua Sailele Malielegaoi: O la e fai atinae mo le atunuu.

FOFOGA FETALAI: Le Taitai o le Itu Agai o lea ua maua lou finagalo. Ua mafua foi le tele o lagalaga ona o le saunoaga a le Sui Taitai e faavasega ai le polofiti ma le tupe pau. A lailoa lau Afioga e tau faapupula ae solomua i lau Sui Taitai na lagalaga mai ia mea faapea.

Susuga Hon Tuilaepa Fatialofa Auelua Sailele Malielegaoui: Lau Afioga..

FOFOGA FETALAI: Ia.

Susuga Hon Tuilaepa Fatialofa Auelua Sailele Malielegaoui: Se ou te fautua atu i lau Afioga se aua e te tautuuu'i. O ia lela e ana upu na lena e sau i le Lipoti.

FOFOGA FETALAI: Ia faafetai. Lau Afioga i le Taitaifono soia ia e te toe talanoa i tua, talanoa mai i luma mai ma faasolosolo mai lau saunoaga i lau Lipoti.

Tulai mai lau Afioga i le Taitaifono faamaea mai lau saunoaga.

Afioga FEPULEAI FAASAVALU FAIMATA SUA: Ia tatou agai atu i le isi mataupu fou.

O le tulaga o le saunoaga a le sui usufono o Tina, Tamaitai i le tulaga tau i le Aoga Seila lea e i gauta i le tatou Iunivesite po o faatumauina pea le taua ma le maualuga o Tusi Pasi. O le tali, o lo o faatumauina lava, pau lava le eseesea lea ua i ai ua se'e mai i le isi faamalu i le isi faamalu. Ae o le tulaga lena.

O isi mataupu lautele i le maitau atu a le Komiti e pei e agai i le Afioga i le Minisita mo le taimi o lana saunoaga e Tali ai le Malo.

Ae momoli le agaga faafetai i le matou Komiti mo le lauliliuina o nei mataupu uma, ia manuia le fonu.

FOFOGA FETALAI: Sui o Safata 1, e te i totonu o le Komiti?

Afioga LEAANA RONNIE POSINI (Safata 1): Ia, o au le isi sui usufono o le Komiti. E talitonu foi e tau fesoasoani atu i le matou Taitaifono. O lea lava ou te talitonu ua atoatoa le saunoaga a le matou Taitaifono, ae i ai lava nai mataupu e toe faapoopo i ai. E toe faapupula lava le tulaga lea i le aoga lea a le Maritime, le aoga lea e ta'u e tatou o le Seila lea e i le tatou Iunivesite.

Na i ai le taimi na fai ai na fai lea o le Aoga Seila lea a le Kamupani Vaa lea a tatou o le Samoa Shipping Corporation, na fai lava le latou aoga. Ae fai lava le aoga a le Maritime ia i lalo o le Pulega a le NUS ona e i ai mafuaaga na talosaga ai le tatou Kamupani Vaa lea o le Samoa Shipping Corporation, e i ai lava nai agavaa e faapitoa i nai alo ma fanau ia o le tatou atunuu lea e galulue i tatou vaa ia i le va o tatou ma Tutuila ma le va i Salelologa. Na ala ai ona fai si a latou foi aoga e faapitoa mo latou tamaiti e faigaluega i le Samoa Shipping Corporation.

A o le tatou Aoga lea faa-Maritime o lo o i lalo lava o le faamalu a le tatou Iunivesite ona alualu lea, o lea la ua toe tuufaatasi foi. Lea ua toe faamaui le tatou Aoga lea a le Samoa Shipping Corporation o lea ua i lalo foi o le faamalu

a le tatou Iunivesite. E pei o le agaga lena, o mea e fetuutuunai ia ma tulaga faapena.

O le isi mea e fia oo i ai se tala lau Afioga o mea ia o alavai lea na taua leaga o matou e agai i le itu lea i Saute o Upolu. O matou foi lea e ui i le auala lea i Tiavi lea ua faatino mai. Ou te manatua lava le lologavai lea o le tatou atunuu i le 2012 lea na toe fai ai le auala lea, se vaega puupuu lava i ina i Tiavi i le faaifoifo atu. Ona o le auala lea na matou maitau lava taimi e tele ai ia lologavai e matua le mafai lava ona feoi ni taavale i le sau o le vai i luga o le auala i taimi e tetele ai. Ae talu la ona fai si vaega lea na fai e le konekarate lea e i ai le ta lamolemole lea na fai ma ou vaai i ai i le faiga o alavai. Ou te faafetai lava i le konekarate. Talu mai lava la le 2012 e oo mai i le taimi lenei ou te le o toe vaai o i ai se tafega i luga o le auala. O le manaia ia o le latou fuafuaga i le faiga o alavai, pei e sau ia ona faaloloto lea o se mea e palasi i ai le vai, ia ona toe build up lea ona toe flow foi lea.

Ae toe agai foi la...e toe tatai foi pei o le mea lea na saunoa i ai le Afioga i le Sui Taitai e agai i mea foi ie e i ai alavai pe foi lele ia a oo i le taimi e tetele ai timuga. Ou te tatalo foi la i le Afioga i le Minisita pe a oo i le taimi e faatino ai le galuega lea, ou te talitonuina lava le alavai lena e i ai i le taimi lenei lea na fai e le Kamupani lea na faia talu ai ma le agaga faaaloalo.

FOFOGA FETALAI: Malo faafetai.

Afioga Sulamanaia Fetaiai Tauiiili Tuivasa: Lau Afioga i le Fofoga Fetalai, o le sui usufono o le Komiti e faaopoopo.

FOFOGA FETALAI: Ia.

Afioga SULAMANAIA FETAIAI TAUIIILI TUIVASA: O le saunoaga a le Sui Tamaitai o Alataua i matou itula ia e faigaluega ai, pei e le logomalie, e le o i ai i totonu ma itula e malaga ai i fafo i asiasiga. Pei o le faatinoga o itula ia e i totonu, o aso fono, ae le o iai ni tulaga i le matou agai atu i tua e fai asiasiga e tailua, taitolu aso. Ona o le a? O le alolofa i le atunuu, e sefe na tupe.

FOFOGA FETALAI: Ia malo.

Afioga SULAMANAIA FETAIAI TAUIIILI TUIVASA: O le saunoaga a le sui usufono o le Vaimauga 2, leaga o lea e le i oo i ai le Taitaifono, lea na ia fautuaina ai ni moli i le magafa lea ia matou. Ia pei o le agaga lea e tatalo atu ai le sui usufono o Vaimauga 1, faaeteete lava aua e fai loa moli o le a poloka ai pei o le itu lea. O la e manaia le taimi lenei. O le isi, o matou foi e i ai le EPC ia ua tautino foi le EPC la e taumafai e sue ni tupe e fai ai nisi vaega ia ae o lea lava e manaia le tulaga lea. Ma lou agaga faaaloalo lau Afioga i le Fofoga Fetalai.

FOFOGA FETALAI: Ia malo faafetai, faafetai le fesoasoani mai i le Komiti. Ia malo lava i la outou Komiti le galulue faatasi.

Ia tulai maia lau Afioga i le Minisita.

Tofa Lenatai Victor Faafoi Tamapua: Lau Afioga i le Fofoga Fetalai.

FOFOGA FETALAI: Oi, malie lau Afioga i le Minisita, se i tulai mai le sui usufono.

Tofa Lenatai Victor Faafoi Tamapua: Ia, e ese le matagofie foi o le tali lea ua aumai e le sui usufono o le Komiti, le uso a sui usufono mai Vaimauga 1. Ae mo le silafia e lau Afioga ma le Taitaifono aemaise foi le Afioga i le Minisita, e tele ina faaaoga e le sui usufono lea le auala alo lea e oso i Vaivase. Lelata, Vaivase, e le o faaaoga e ia le auala lea. Ia pei o le tulaga lena e le o malamalama lelei ma silafia, pei ona ou taua, pe faa-5, faa-7 i le aso ou te faaaoga le auala lea. Ia ma le faaaloalo lava.

FOFOGA FETALAI: Ia.

Tofa Lenatai Victor Faafoi Tamapua: A o le talosaga sa avatu na o se feasibility study pe talafeagai pe leai ae ou te le i tatalo ia fai loa ni moli i le taimi nei. Ma le faaaloalo lava.

FOFOGA FETALAI: Ia lelei o le a lafo pea i le Afioga i le Minisita ma le Pulega mo le talosaga. Tulai mai lau Afioga i le Minisita.

Tofa Hon OLO FITI AFOA VAAI: Lau Afioga i le Fofoga Fetalai faafetai i le avanoa. O lea faatoa maitau atu nei e le fealofani Vaimauga i totonu o le Maota. E omai tauaimisa i totonu i i. Ae se i ou tali puupuu atu i i nisi foi o vaega na laga e Afioga i sui usufono mamalu e tusa ai ma le Lipoti a le Komiti.

Ou te faafetai atu i lau Afioga le Taitai o le Itu Agai e tui lelei lau earphone ina ia manino lelei lau faalogo ma lau faafogafoga mai mo le tulaga e faatupu manatu. E leai se fesili a le Taitai o le Itu Agai ae na o ona mafauauga ma lana tofa e faatupu manatu mai i le tatou Malo aemaise le tatou Matagaluega.

O le aualalaupapa lea e i le Lelata lau Afioga le Fofoga Fetalai, o lea sa i ai le fund foi lele a le TCF e fausia ai le aualalaupapa lea. Peitai o le tele ia o faafitauli na tulai mai ma o lo o tulai mai pea i le donor lea a tatou ma o le mataupu foi lea o se mataupu ua leva na feagai ma le tatou Faigamalo talu ai i le mea lava lea o le tele e le flexible le latou silasila i issues ia e avatu e tatou, e tai pei o aiga ia e papaaao ma alaala i tafatafa o le vaitafe. E tasi lena vaega na matua tetee a nisi o aiga i i le tatou Poloketi lea ma e concern tele i ai le donor ia le... O isi mea o mo... o le tau fai o tatou...ua tele tele ia tulaga o latou safeguard issues i totonu o le mataupu lea ma ou te iloa o lea ua i ai le finagalo o le tatou Matagaluega o Tupe e sili ia ona saili se isi fund e faatino ai le tatou galuega lea ma e auai foi le manatu. Ona o le tele o le taimi a le afaigaluega e faatino ai le Poloketi lenei ia e i ai lava le tulaga o issues e raise mai e le donor e le talafeagai.

O le tulaga o tatou alavai i le eseese o alavai, o lena tou te silafia e loloto lava alavai i lalo i le gatasi lea e i ai e pei ona taua foi e le Afioga i le Taitai o le Itu Agai i Vaimea. E sao lelei le tulaga lena ma o la foi ua faamauina le finagalo o le Afioga le Taitai o le Itu Agai, ma ua leva foi lena mea. O le isi vaega ia mo mea ia o alavai ua fai si leva o fanua ia o aiga i lalo o le vaimea ia ma o i... aemaise lava le agai atu foi i o le Vaimauga. E leai ni reserves a le tatou Malo e mafai ai ona toe faalatele le auala ma tulaga uma ia. O fanua umia saoloto o aiga, o isi aiga e mananao e compensate o latou fanua a o isi aiga e matua le mananao lava e faaoga a latou fanua e faalateleina ai le auala ina ia mauitu atu le faiga o alavai a le tatou Malo e pei o le vaega lena o lea foi la i Cross Island Road lea ua outou fesiligia i le tulaga o alavai.

E sa'o pei o lo o i ai uma lava i lalo o design mo tatou galuega ia ma auala ia le tulaga o alavai. E aumai lava la le design a le ADB po o le World Bank i le faiga o galuega tatou te follow ai lava i le tulaga lena ae ave ai lava se tatou tuualalo foi lea. O isi alavai ia pei ona taua ua fai si dangerous ua loloto tele e tele ina a lavea ai se taavale e ono maimau ai se soifua, e sao foi lena vaega o lo o ave lava le fautuaga i le tatou galuega i konekarate ia aemaise donors i le i tulaga faapena.

A silasila foi la i le eseese a oo loa i le gatasi ua tau faaloloto a tatou alavai ae a oo loa i le agai i luga o mauga e slope foi lea, e faapena foi ona tau faapapau aua e flow lava le vai latou ia agai i lalo. Ma e pei ona fesiligia e le Afioga i le Sui Taitai, ia ua i ai tulaga uma lava faapena e tata'i ai alavai, agai mo tatou... agai i tua i se mea e talafeagai.

O le tulaga i moagavao ia pei ona taua, ia e sao, o lea foi ua...

Afioga Fuaava Suluimalo Amataga: Lau Afioga i le Fofoga Fetalai pe maua se avanoa faamolemole...

FOFOGA FETALAI: Malie lau Afioga i le Minisita, se i tuu atu le avanoa i le sui usufono lea mo Aleipata Itupa i Luga.

Afioga Fuaava Suluimalo Amataga: Faafetai mo le avanoa. Ona o lea e maitau atu o le a see le saunoaga a le Minisita i moagavao, ae pei o le tulaga lea i alavai, lea sa avatu ai se faamatalaga a lena itumalo. I auala ia mai le coastal road lea e pito i le sami ma auala foi ia lea e taua o auala o le Tsunami, lea na talosaga atu ai i le tausiga la o auala ia lea e fesootei mai ai tai i uta.

O faafitauli la e tulai i le taimi lena e le o i ai ni alavai e kolosi ai le auala lea i le coastal road e alu agai le sami. O lea ua fai alavai o le auala lea o le Tsunami a o si ona lave na ona tuu atu lava i mea foi ia o natural causes lea e tau lava e toeaia o omoa'i. Na sue atu lea e le vai alu atu loa to'a i tai i aai lea la e lavea ai Ulutogia e oo foi i le Itupa i Lalo, i Lotopue ma Mutiatele. A outou silasila i ai a oo loa ina timuga e toa uma le vai i ina le malae. E le o mafai la na tata'i atu le vai lea agai le sami ia tau fesoasoani ai aua o le vai lea ua tafe atu i le auala tele lea o le Tsunami e i uta, ua alu atu loa ua to'alia i tai i aai ma maota. Ae pei o se tulaga lena, a toe taumafai loa e tatai ia alu atu loa ma alu i le sami

e pei o se fesoasoani atu lea i le tulaga na tatalo atu ai ma le agaga faaaloalo lava. Faafetai.

FOFOGA FETALAI: Tulai mai lau Afioga le Minisita.

Tofa Hon OLO FITI AFOA VAAI: Faafetai ua faamauina le finagalo o le Afioga i le sui usufono, ma o tulaga uma lava ia e pei ona i ai fuafuaga a lenei foi Vaega e maea loa fonotaga ona faapena loa lea ona agai atu asiasiga e asiasi i mea ua finagalo ai Afioga i sui usufono o le Maota.

O moagavao lau Afioga i le Fofoga Fetalai o lea e i ai le fautuaga foi lele e tuuina atu i tua i itumalo. E pei lava ona ou fai atu i se tasi o fonono e oo atu ia Iulai ua mautu Faiga Faavae e faatino ai le tatou galuega ia e tuuina atu ai moagavao i tua i itumalo latou te tausia. Peitai lau Afioga i le Fofoga Fetalai e i ai le manatu foi lea i totonu lava o alaafaga e... e i ai mafauauga e le tatau ona oo i ai le tulaga foi lele o le totogi o itumalo latou te faamamaina. Ona o le tele o isi alaafaga o la e faatino lava e latou ia le tausiga o tafaala i totonu lava o alaafaga ma o se mea talafeagai. O le tausia lava e latou ia le tulaga o le matagofie ma le aulelei o alaafaga taitasi. Atonu o le sao foi lea o le tatou atunuu, e tau faaitiitia ai tupe faaalu i mea ia i totonu o alaafaga i le moaina o vao i totonu o alaafaga ae faasao a tatou tupe e fai ai tatou auala e pei ona tatalo mai.

O le isi mataupu i mea lava ia o moagavao e sao lelei le tulaga lea i konekarate o lo o latou faatinoina le galuega i le taimi lenei ma e le o toe umi i le mea lava lea o le moa o le vao vaeatu le paia o le Maota ae leai ni faailoilo o i ai. O lea ua faafofoga mai le aumoavao ia na ou sau foi talaatu ananafi o le mea foi lena la e moa lava le vao e leai ma se... ni cones foi lele e faailoilo o latou la e faia le galuega. Sa ou faalogo atu foi i le isi taimi e i ai le isi tagata o le aumoavao e tu ma lana faili e faili i o le aumoavao e taofi se i pasi le taavale. Ua maitauina lava le tulaga lena, faafetai i le laga mai o le mataupu lea a o la e faafofoga mai le aumoavao. Ona e fai a si tele o le taimi lea e faagasolo atu ai galuega ia ia Iulai a o faafogafoga mai le tatou Matagaluega o le LTA, afai e le toe faia e moagavao ma konekarate tulaga e pei ona fautuaina e le Palemene i le tulaga o le faailoilo, ia fai se faamalologa manumalo a na foi konekarate.

I le tulaga o access road e pei ona saunoa mai ai le Sui Taitai, e mo le silafia foi o le tulaga lea ua i ai tatou i le taimi lenei, o lea lava ua tuuina atu a tatou access roads i lalo o tatou Poloketi a itumalo.

E moni le tala lea toetiiti lava alu atu lau asiasiga toetiiti a le iloa se auala i le vao, i le tulaga o le... A o auala ia sa faata o le tele foi ia o tupe a le tatou Malo sa faaalu ai. Ae o le tausiga la o tatou auala, o la e foi sa faatalitali mai i le tatou Malo tatou te o atu e vele i tua fue ma mea o vao o lo o ua sosolo i luga o le auala lea e mafua ai ona taei le ta lea ma faaleagaina ai foi na atinae sa faatino atu e le tatou faigamalo talu ai.

I le tulaga o mea ia faapea o le agai atu o le LTA e toe fai le monitoring, lau Afioga i le Fofoga Fetalai o le mea e tatau ona fai ona e le gata o aseta a le tatou Malo lea e faatino ai galuega ia i itumalo ae ao lava ona o lea e i ai le agavaa o le LTA latou te asiasi i ai po o talafeagai. E le gata foi la i lena, a ia asiasi foi po

o faatino la e itumalo galuega ia e tuuina atu ona o lea e totogi atu e le tatou Malo tupe i itumalo mo le faatinoina o le auunaga nei.

O alii seila o lea ua uma na tali atu le Afioga i le Taitaifono. Na pau le vaega lea pei ona fesiligia o le tatou... o le vaa foi lea o le Pasefika Express lea e faapea e \$3,000 le tau na faatau ai. O le vaa lea o le Pasefika Express o le vaa a le atunuu o Toelau na foai mai ma tatou ina ua faaleagaina, e leai se tupe sa faatauina ai e tatou le vaa lea a Tokelau ae na o le administration fees i le... administration fees sa totogi le \$3,000 e transfer mai ai le ownership o le Pasefika Express ia Samoa po o le Samoa Shipping Corporations.

O le tulaga la sa i ai sa manao le tatou Malo e tuuina atu le vaa lea i le tatou Maritime School e faatino ai a latou aoaoga, peitai, e le i taliaina e le NUS le vaega lea. Ona fai ai lava lea ua toe toso i Savaii le vaa lea paka i Salelologa ma tender ai i tua pe i ai se isi e manaomia, e faalua na tender le vaa lea e leai se isi e fia fai vaa ai. Ia ona fuafua loa lea o le a faagoto. Peitai na i ai se tasi o faipisinisi foi i Savaii sa ia offer mai e avatu le vaa lea e manaomia e ia afi o lo o i totonu ae faagoto le vaa ua faaleagaina. O lea la sa i ai le tulaga lenei pe \$1,000 ea sa faatau ai.

O le isi vaa lea o le Express 2 lea e... lea sa i ai muamua ae le i sui ina mai sa tender out le vaa lenei, o le vaa na e i lalo o le tatou Malo le vaa na e le o vaa foi lea na foai mai Iapani. Ma o le highest bid e \$450,000 o lenei la sa faatau ai loa le vaa lenei o lo o tu lava i Mulifanua i le taimi lenei.

O le tulaga lea i le... i Defects Period lea e faapea mai e tuu atu i le 24 masina, ia e moni le Afioga i le tamaitai sui usufono o le upu lea e i ai e mafai. Ou te le i fai atu e le i fai atu le Malo o le a fai, so there's a possibility e mafai ona iloilo ai le tulaga lea pe mafai pe leai ae ia te a'u ma lo'u vaivaiga i le tulaga lea e le mafai ona faatino le vaega lea.

Lau Afioga i le Fofoga Fetalai, e pei o... e pei la o Vaivase-uta lau Afioga i le sui usufono o Vaimauga, ia, o lo o iloilo le mataupu lea i lou Itumalo e fai ai se faiga ina ia faaleleia itu uma lea.

O i i le magafa i i Matautu, ia ua tatou molimauina le tulaga o poloka o tatou taavale i luga o le auala i le taimi nei ona... sa lelei foi le faiga o tatou traffic lights i na taimi e le i tele tele taavale. Peitai, e pei lava o traffic lights le isi mea lea ua tele ina poloka ai taavale i luga le auala. E i ai le fuafuaga e pei e sili atu le tulaga o tatou roundabouts e faatino e tai pei la... Aua ua ou alu nei ou vaai i Matautu i le roundabout la e i ai e leai ma se poloka o le auala i le taeao ma le afiafi i ina. Ae foliga la o Matautu e tau fuafua i ai le tulaga na o se roundabout ina ia flow le tatou traffic i le taeao ma le afiafi. Ia, ae a faapea lava e i ai nisi mafauauga e fai ai moli, ia, e fai lava moli e toe aumai ai le matou moli la e i Salelologa e feoai ai taavale i le taeao ae feoai ai solofanua vaeatu le paia o le Maota i le afiafi pe a... ona e alu ai le tatou power.

Oi, o lea e i ai le isi lipoti lea a le tatou malaevaalele i le faaogaina o Tiavea i le taimi nei. Ia, o lea ua i ai le fuafuaga a le tatou Malo e faaumauma lava le fanua lela i tatou solar farms. O lea ua amata ona tuuina atu le expression of interest i ni kamupani latou te fia faia le tulaga o solar. Ma le toe faaogaina o... o lea foi e aumai le fautuaga ina ia toe faaogaina Asau, malaevaalele i Asau ma Maota. Lau Afioga i le Fofoga Fetalai, e le i tapunia lava tatou malaevaalele

nei e oo mai lava i le taimi nei ae fua lava i le Samoa Airways ma isi vaalele, pe latou te fia faaaogaina tatou malaevaalele ia ae o lo o tumau lava le maintenance ma le faaleleia o tatou malaevaalele ia e lua i le motu o Salafai.

Ona faauma atu lea o sau faamatalaga lau Afioga i le Fofoga Fetalai, e faafetai atu i le Komiti i le latou tapenapenaga ma latou Lipoti na tuuina mai. E pau lava lea o si vaega lau Afioga i le Fofoga Fetalai, o Lipoti ia e tuuina mai i totonu o le Palemene e tatau lava ona mautinoa e so o se Komiti le sao atoatoa. O lea foi ou te molimau i nisi foi o finagalo faaalua ma e talu lava na ou Itu Agai ma ou i ai i totonu o Komiti ia e leai ma ni mea sese faapea o ni sipelaina o upu po o a ni mea. O lau galuega lena e fai i lou vaai i ai ona o le Palemene lena e aumai ai mea... o mea moni ma mea e aumai atoatoa.

A silasila lau Afioga i le Fofoga Fetalai i le isi foi fautuaga lea ma isi... Lea e aumai e isi le lipoti lea. O lo o faapea mai le Komiti ia mafai ona faamalosi... silasila le Malo ia mafai ai ona faamalosi e le Pulega a le LTA konekarate o lo o faaaogaina masina tetele. A o le mea lea e bracket ai i autafa o excavators. Ou te le iloa i le tou Komiti po ua outou fiapupule i le tele o le masina a le Atua ua outou fai mai ai e fatetele masina. Lau Afioga i le Fofoga Fetalai, e feoloolo le English Version pe sese le spelling ae le suia ai le context o le mea, a o le faa-Samoa e matua sese atoa lava le mea nei. O masina tetele, o lea ou te iloa i masini tetele. Ae leaga lea ua ou talanoa atu i le Lipoti e aumai i totonu o le Palemene, ae toaiva sui usufono mamalu o le Palemene i totou o le Komiti. Lea foi ou te iloa pei lava lea e i ai ma le Taitai o le Agai i i. Ae matua leai lava ma se isi e iloa sipela le upu masina. Sole, M A S I N I masini. Ua leai se eseese o le tou sipelaga o le upu lea ma le sipelaga e Laauli o le agasala.

Susuga Hon Tuilaepa Fatialofa Auelua Sailele Malielegaoi: Lau Afioga i le Fofoga Fetalai...

FOFOGA FETALAI: Ia, se i tulai mai...

Susuga Hon Tuilaepa Fatialofa Auelua Sailele Malielegaoi: E le o i ai se Taitai o le Itu Agai i le Komiti lea. Ae ou te fautuaina le Minisita e faatonu ane a outou Taitaifono e faasao a latou gagana.

FOFOGA FETALAI: Ia, se i tulai mai lau Afioga i le Minisita...

Tofa Hon OLO FITI AFOA VAAI: Ia, faafetai, o lea e sese atu... e sao si au uo. O Lupematasila faapea au o Lupesoliai. Ia lau Afioga i le Fofoga Fetalai, ona faauma atu lea o sa matou tala ma le faaaloalo faafetai.

Tofa Lenatai Victor Fafoi Tamapua: Lau Afioga i le Fofoga Fetalai, faamolemole...

FOFOGA FETALAI: Tulai mai... Tulai mai oe Vaimauga 2.

Tofa Lenatai Victor Faafoi Tamapua: Faamalo faafetai i lau Susuga i le Minisita mo le saunoaga matagofie. Ae ona o lea ua e taua masina tetele... masini tetele. Ia, a o lea sa taumafai atu se tuualalo po o le a se finagalo i le tulaga foi lea i le faaoga o le lane lea e pito i fafo ia flow ai lava le traffic aemaise o le agai mai lea i Malifa i o i Vaitele ma le toe agai mai. Ma le faaloalo lava.

FOFOGA FETALAI: Tulai mai lau Afioga i le Minisita...

Afioga Fuaava Suluimalo Amataga: Lau Afioga i le Fofoga Fetalai mo le faasoina o lou taimi.

FOFOGA FETALAI: Ia, mo le faasoina o lou taimi i lau Afioga i le Minisita. Tulai mai le sui usufono mai Aleipata Itupa i Luga.

Afioga Fuaava Suluimalo Amataga: Ia, faafetai. O lea ua faamaeaea mai le saunoaga a le Minisita o lea foi ua uma ona saunoa i le tulaga o moavao. Ae pei o i sa auala atu ai se talosaga a lenei itumalo. O le tulaga foi lea o tauluulufau ia e falala mai i luga o le auala aemaise lava o le Mafa ma le agai atu lea e i tua. O le uiga o le faamatalaga leaga o le Mafa lea e tele lava ina solo ma poloka ai le agai o matou i Sasae. A o le solo foi nei, a mamafa tele le falala o laau nei ua faigofie foi ona mataga mai le papa ma le palapala. Ae a pe a tau faamanifi foi lea, ia ou te iloa foi o le a fiafia foi le afaipasi ma failoli maualuluga ma mea faapena, o le a le toe lavea ai... Ia ua na o se mea pe tau trim laitiiti tulaga ia. Afai lava e lavea i lalo o sina vaega a le aumoavao ia pei o le tatalo atu lena o lenei itumalo ma le agaga faaloalo faafetai.

FOFOGA FETALAI: Ia, lau Afioga i le Minisita.

Tofa Hon OLO FITI AFOA VAAI: E faamalulu atu ua misi le vaega lea. Ae ou te iloa na o e lava e faipasi e le fiafia i le mea lea. E le o aumai se faasea a le Tamaitai Palemia ma le Taitai o le Itu Agai e nonofo uma lava i le vaega lea, ae faafetai o lea ua faamauina e le matou Pulega lou finagalo i le tulaga o fau na.

O tulaga i le mataupu lea pei ona e laga lau Afioga i le sui usufono o Vaimauga, faafetai lava. Manaia tele lou finagalo leaga ua tatou maitauina le tatou poloka ai i loli tetele ia a o lea ua faafofoga mai foi le Afioga i le Minisita o Leoleo ia ma se matou tuualalo foi ma le matou galuega e faifaatasi. E manaia le fuafuaga lena. Ua matuai ou talia ma le faafetai lau tuualalo lea. Na o lau Afioga lava e aumai manatu lelei mai lena itu. Faafetai lava ma le faaloalo.

FOFOGA FETALAI: Ia, tulai mai lau Afioga i le Taitaifono mo le lafo. Ia, lau Afioga i le...

Susuga Hon Tuilaepa Fatialofa Auelua Sailele Malielegaoi: Lau Afioga o le faafesili atu, o le a ea le tonu o lou finagalo lea e toe aumai se avanoa ia te au?

FOFOGA FETALAI: Ia, a lea sa ou fai atu e maua lou avanoa pe a tulai mai le Afioga i le Minisita.

Susuga Hon Tuilaepa Fatialofa Auelua Sailele Malielegaoi: Ia, ua lelei.

FOFOGA FETALAI: Ia, lea ua saunoa le Minisita i le malaevaalele. Ia, ua a? Ua leai la se isi... O lou avanoa lena e fai ai au fesili i le malaevaalele aua e tasi le Lipoti lea e i o i le malaevaalele.

Susuga Hon Tuilaepa Fatialofa Auelua Sailele Malielegaoi: Lau Afioga i le Fofoga Fetalai, o le mataupu lea tau vaalele, ou te fia talanoa i le fautuaga e tatau ona faaoga malaevaalele ia i Savaii i Asau ma Maota. Ma o lea ou te malamalama i le taua o malae vaalele ia e lua. Ma o le mafuaaga foi lena na ala ai na fausia malae ia ia fai ma faaoga. O le itu lea e avea pea ma luitau, e faigata ia i latou ia e malaga soo i Savaii ona latou faaogaina malae vaalele ia aemaise lava Maota, a o lea e saosaoa le tatou vaa lea e alu atu i lalo na o le tasi le itula, e sili atu ona manaia i le malu. Ae le gata i lena e te mafai ona e alu atu ai i le vaa lea i lau lava taavale taamilo i Savaii toe foi mai e sau i le vaa i lau lava taavale. Ae a e alu atu i Maota, o lona uiga e toe sue sau taavale e te fealuai ai. O le faigata lena ona e fai lava si taugata mo i latou e manao e faaoga malaevaalele ia ae aoga mo mea faalavelave tupu faafuasei. E aoga foi i malaga faale-Malo. O lona uiga e tatau ona teuteu pea malaevaalele ia e lua.

Ae o le faafitauli tele lea e i ai, ua tuai foi ma tatou vaalele. O lea foi la e i ai le fuafuaga a le Komiti e tatau ona finau lau Afioga e faatau mai ni tatou vaalele ua tuai vaalele, tamai vaa ia e i ai i le taimi nei. E le gata la o lea e serve ai Pago Pago ae e i ai le taimi e ono faaoga mo Savaii aemaise lava mo faalavelave tutupu faafuasei. O le tatou usugafono lea e fuafua mo taitai o le Commonwealth e ono i ai lava ni tagata e fia malaga i Savaii se i matamata atu foi i Savaii. Masalo o lou avanoa lea e te finau ai e aumai... e faafou mai ni vaalele. A o lea foi e faatali po o fea... o le a le tulaga o au vaalele ia na e alu nei sainsi i fafo.

Afioga Hon Fiamē Naomi Mataafa: Lau Afioga i le Fofoga Fetalai o le mea e fia faamalamalama.

FOFOGA FETALAI: Ia malie lau Afioga i le Taitai o le Itu Agai se i tulai mai lau Afioga i le Palemia.

Afioga Hon Fiamē Naomi Mataafa: Ia, o le Lipoti lava ia o lo o faasino i malaevaalele lea la o lo o i ai, a o le see mai o le saunoaga a le Taitai o le Itu Agai i vaalele, ia e ese le Minisita. Ma o au lea e sui ai i le Minisita e faasino i

vaalele. Ae taatia maia lou finagalo, tatou talanoa pea i malae vaalele a le Minisita o Galuega.

FOFOGA FETALAI: Ia, lau Afioga i le Taitai o le Itu Agai...

Susuga Hon Tuilaepa Fatialofa Auelua Sailele Malielegaoui: Ia, e faaiu atu ai lau mataupu, i o i le malaevaalele lea e i Aleipata. O le fautuaga i lau Afioga, se i toe fetuunai le tofa. Ou te tatalo foi i le Tamaitai Palemia se i silasila totoa i le agaga na faatino ai le fuafuaga lea ona e taua tele le malaevaalele lea. E tele lava mea e taua ai aemaise o lea e agai i luma le soifuaga ma o loo televave foi le tuputupu pea o femalagaiga i le va o tatou nei ma Tutuila aemaise le ono taua i taimi o faalavelave tuputu faafuasei i le ono puaoa ai o malaevaalele ia i inei i Apia faapena foi le malaevaalele i Faleolo. Leaga o i ina tonu lea na tupu ai le isi faalavelave, sau i i o puaoa Fagalii, lele i o puaoa, ia lele mai loa i uta crash loa. O le tulaga la lena lea ou te talanoa atu i mea na tuputu, feoti ai ma tagata. Aua a tupu se faalavelave i le taimi nei lea o le a e suia ai mea ia, ou te le iloa po o ua ioeina e le Kapeneta, e tietie i lou muaulu le fetuu a le atunuu nei.

Ia lau Afioga i le Fofoga Fetalai, o le tulaga lena lea na ou tulai atu ai.

FOFOGA FETALAI: Ia malo. Tulai mai lau Afioga i le Minisita. O lea ua faaiuiu le saunoaga a le Taitai o le Itu Agai.

Tofa Hon OLO FITI AFOA VAAI: Lau Afioga i le Fofoga Fetalai, o lea ua faamauina le tuualalo faa-Toeaina foi a si au uo. E fai lava tatou solar foi ia e agai i autafa o le tatou strip a le malaevaalele foi lea ona e tilotilo i le tulaga o emergency landings. So aua la e te popole lau Afioga i le Taitai o le Itu Agai i le vaega lea.

O le tulaga foi lea i Savaii e le mafai ona tapunia tatou malaevaalele i Savaii. Ma e ui lava e le o i ai se schedule a le Samoa Airways e agai ai latou vaa laupasese agai i Savaii ae o le tele ia o tatou charters ia ua faaoga ai foi vaa Samoa Airways, vaa laiti ia i le taimi nei. Masalo o le tausaga lea na tea nei pe maua le sefulu, sefulufa (14), sefululima (15) charter flights sa agai i ai le au tafafao e agai atu i i Fagalii. O le mea tonu lava lena na toe tatala ai Fagalii ona o le tulaga lea ua saunoa ai le Taitai o le Itu Agai e leai se tagata o le a toe oo atu i o i le uafu e alu toe tasi itula ae toe lele i le vaalele. O le agaga tonu lena sa toe tatala ai Fagalii ma le mea lea o le oso atu lava lea o le oso atu i le hotel i Taumeasina i le 2 minute lele loa.

E pei o le tulaga lena lau Afioga i le Fofoga Fetalai ae o lea ua manino le vaega lea lau Afioga i le Taitai o le Itu Agai aua te popole. A faapea foi e maua se avanoa e fai ai se ta malaevaalele o vaalele tau...

Susuga Hon Tuilaepa Fatialofa Auelua Sailele Malielegaoui: Lau Afioga i le Fofoga Fetalai...

FOFOGA FETALAI: Ia tulai mai lau Afioga i le Taitai o le Itu Agai.

Susuga Hon Tuilaepa Fatialofa Auelua Sailele Malielegaoi: Ou te tulai atu lava e taua tele le faasilasilaga lea, a ia silafia ai e latou uma o lo o i ai mo mea o miti foi o le a fai le malaevaalele faava o Malo i o e atiae ai le itu le la, e leai se mea faapena e tupu. O lea foi sa ta talanoa ai i le isi foi faimiti na sau na ou taua atu ia te oe e leai se mea e tupu.

Sa ou taua foi ia Laauli ina ua talatalanoa mai ia te au, e i ai tagata lea e omai e fia fai latou faletalimalo tetele e omai i ai vaalele mai fafo, na ou fai atu lea ia Laauli, “Laauli o atu i ni tulaga o ni lisi e fai mo lou Itumalo e maua ai tupe a le tou nuu, ae leai se malaevaalele e mafai ona faia i o, seiavagana na o le tagata e faaletonu le mafaufau.” Aua a oo loa ina saili tupe e faitau miliona ma miliona ma piliona. O fea e alu i ai? E o i le faletupe. E tasi lava le fesili a le faletupe ma accountants e i ai, e fia vaalele la e i Samoa? E fia Turisi la e i ai? Ae fia faletalimalo? O half full? Ae aluatu e le half full uma ona leai lava lea ma se mea e tupu e oo mai nei lava o la e i ai tagata faapena o la e feoi solo ma o atu ia te au. E leai se faletalimalo e faitau piliona tou te mananao e fai tai. E tilotilo tagata i le tulaga lea o lo o i ai e le gafatia e Samoa se na mea faapena. Lau Afioga e aoga foi lou tulai mai ua iloa atu ai ma le mea lena o le tagata fai miti. Tuu le tou fai miti.

FOFOGA FETALAI: Malo faafetai, se i tulai mai lau Afioga i le Minisita o Faatoaga.

Susuga Hon Laauli Leuatea Polataivao Fosi: Se e lelei a ona faasaosao tatou tala ona o la e molimau mai si o matou Itumalo, matou te le i talosaga i se malaevaalele. O la e i ai le matou Malaevaalele i Aopo. O Aopo e sosoo ma Asau o Fatumana lena e sosolo mai ai le malaevaalele.

O la e i ai le matou malaevaalele ua leva ona i ai talu ona faavae le atunuu. A o le mea lea e saunoa i ai le Taitai o le Itu Agai, o la e lava e maua si a matou \$300,000 i le tausaga mai le 10+ tausaga talu ona lisi le matou fanua. E le o se miti leaga la le matou miti na fai. E tatalo i le Atua ina ia faataunuu ma tupu. Ae pei ona ou fai atu e eseese uma tatou faigamiti. A o le tulaga lena mo le faasao atu o la lava e faasolosolo si a matou mataupu.

Susuga Hon Tuilaepa Fatialofa Auelua Sailele Malielegaoi: Mo faletalimalo foi ia na o le tai 400 tagata e o i ai, e le taunuu se mea faapena.

FOFOGA FETALAI: Ia malie lau Afioga i le Taitai o le Itu Agai.

Susuga Hon Laauli Leuatea Polataivao Fosi: Ia i lou lava lena finagalo, ioe. Ae taatia maia si a matou mataupu o la e lava e sologa lelei si a matou lisi ma maua tupe a le nuu. Ae afai foi e tupu, viia le Atua ae taumafai oe pe mafai ona fai se faletalimalo i lou itumalo, Ma le agaga faaloalo.

FOFOGA FETALAI: Ia malo faafetai. Ua manatu foi le Nofoa...

Susuga Hon Tuilaepa Fatialofa Auelua Sailele Malielegaoi: Pau lava le mea lau Afioga o lea e i ai le faletalimalo ae le o silafia e... e i ai foi Lepa.

FOFOGA FETALAI: Ia o lea ua maua ae leaga o le a tatou oo i faigamiti a o lea e faatali le tatou Lipoti e le i pasia. Se i tulai mai lau Afioga i le Minisita se i faauma mai lau saunoaga leaga o lea ua...

Tofa Hon OLO FITI AFOA VAAI: Ua leva ona faauma atu lau Afioga lau faamatalaga, ae fai fai foi le taua a Isaraelu ma le Palesitina e fai fai uma ae le toe uma le taua a le aualii ia e toalua. Le tatou Palemene ia tatou tatalo faatasi i agaga o le Minisita ma le Taitai o le Itu Agai, ia vave ona la talia Iesu ia fai ma Alii ma Faaola. Ua uma le matou faamatalaga faafetai.

FOFOGA FETALAI: Ia o le matou foi lena tatalo. Tulai mai lau Afioga i le Taitaifono mo le lafo.

Afioga FEPULEAI FAASAVALU FAIMATA SUA: Faafetai mo le avanoa lau Afioga i le Fofoga Fetalai. Na o sina mea laitiiti a lea lau Afioga.

FOFOGA FETALAI: Ua maea le taimi faatu mai le lafo.

Afioga FEPULEAI FAASAVALU FAIMATA SUA: Leai o le faasaoga o le saunoaga lea i le masini. O lea e sao lava le tusiga lea e tusi ai le matou Lipoti o le masini ae le o le masina.

O le lafo, e momoli le agaga faafetai o lenei Komiti i le mamalu o Matagaluega i Ofisa Sili o Pulega o Matagaluega taitasi, Matagaluega o le Pule Faatonu, Matagaluega o le Punaoa Faalenatura ma le Siosiomaga, Matagaluega o Fesootaiga ma le Matagaluega o Galuega, Felauaiga ma Atinae Eseeese.

E faafetai foi i le Pulega o Malaevaalele, Pulega o Felauaiga i le Laualeele, Pulega o le Suavai, Faalapotopotoga o le Malosi Faa-Eletise ma le Faalapotopotoga o Vaa, aemaise o le Auaunaga o Vaa a Samoa. E fai ai lou leo e fai ma fofoga taumolimoli o le Komiti e faafetai ai i Pulega taitasi i le taimi o tatou feiloaiga ma le faatalatalanoaina o tatou Lipoti faafetai malo le galulue.

E faafetai foi i le matou Komiti mo galuega lelei o le la tausaga seia oo mai lenei taimi.

Ae lau Afioga i le Fofoga Fetalai ou te faatu le lafo ina, *Ina ia mafai ona faamaonia e le Fono Aoao Faitulafono Lipoti e iva (9) a lenei Komiti.*

Faafetai.

Faaluaina e le sui usufono mo Vaisigano 1, sui usufono mo Aana Alofi 1, sui usufono mo Vaimauga 1 ma le sui usufono mo Safata 1.

Na faamaonia le lafo.

FOFOGA FETALAI: Ou te tapa lau Afioga i le Minisita mo Galuega, Felauaiga ma Atinae Eseeese.

Afioga Leana Ronnie Posini: Lau Afioga i le Fofoga Fetalai...

FOFOGA FETALAI: Sei tulai mai le sui usufono mo Safata 1.

Afioga Leana Ronnie Posini: Leaga e te musu e tau au lea foi sa ou tu atu nei, pe i ai se mea ua e toatamai ai lau Afioga.

FOFOGA FETALAI: Faaopopo ifo ma le sui usufono mo Safata 1. Tulai mai lau Afioga i le Minisita.

Tofa Hon OLO FITI AFOA VAAI: Lau Afioga i le Fofoga Fetalai ou te faatu le lafo ina ia faamaonia e le Fono Aoa Tali a le Malo i Fautuaga o Lipoti e iva (9) a le Komiti o le Vaega o Atinae Eeseese.

Faaluaina e le Minisita mo Faatoaga ma Faiga Faiva, Minisita mo le Soifua Maloloina ma le Minisita mo Taaloga ma Alagaoa mo le Fiafia o Tagata.

FOFOGA FETALAI: Sa e tulai mai le sui usufono mo Safata 1?

Na faamaonia le lafo.

P.P.2022/2023 NU. 91, LIPOTI A LE KOMITI O TULAFONO TUMAU, MATAUPU TAU FAIGA PALOTA, TALOSAGA MA TOFIGA FAALE-FAAVAE I LE P.P.2020/2021 NU.69 MA LE P.P.2021/2022 NU.12, LIPOTI FAALETAUSAGA A LE PENISIONE A LE PALEMENE MO TAUSAGA FAALETUPE 2019/2020 MA LE 2020/2021 – ILOILOGA

P.P.2023/2024 NU.33, TALIA A LE MALO I LE P.P.2022/2023 NU.91

P.P.2022/2023 NU.151, LIPOTI A LE KOMITI O TULAFONO TUMAU, MATAUPU TAU FAIGA PALOTA, TALOSAGA MA TOFIGA FAALE-FAAVAE I LE P.P.2022/2023 NU.130, LIPOTI FAALETAUSAGA A LE PENISIONE A LE PALEMENE MO TAUSAGA FAALETUPE 2021/2022 - ILOILOGA

P.P.2023/2024 NU.74, TALIA A LE MALO I LE P.P.2022/2023 NU.151.

FOFOGA FETALAI: Tulai mai lau Afioga i le Taitaifono o le Komiti o Tulafono Tumau, Mataupu Tau Faiga Palota, Talosaga ma Tofiga Faale-Faavae.

Afioga AUUAPAAU MULIPOLA ALOITAFUA MULIPOLA (Taitaifono o le Komiti o Tulafono Tumau, Mataupu Tau Faiga Palota, Talosaga ma Tofiga Faale-Faavae): Lau Afioga i le Fofoga Fetalai ou te faatu le lafo, *Ina ia faautagia e le Fono Aoa Lipoti e lua a le Komiti o Tulafono Tumau,*

Mataupu Tau Faiga Palota, Talosaga ma Tofiga Faale-Faavae o lo o tuuina atu ai ana Sailiiliga, Fautuaga ma Iugafono.

Faaluaina e le sui usufono mo Vaisigano 1, sui usufono mo Gagaiformauga 2 ma le sui usufono mo Faleata 1.

Na faamaonia le lafo.

FOFOGA FETALAI: Ou te tapa lau Afioga i le Minisita o Tupe, o le Minisita foi lea o le Faalapotopotoga.

Afioga Hon LAUTIMUIA UELESE VAAI (Minisita o Tupe): Lau Afioga i le Fofoga Fetalai ou te faatu le lafo, *Ina ia faautagia e le Fono Aoa Tali a le Malo e faatatau i Fautuaga a le Komiti o Tulafono Tumai, Mataupu Tau Faiga Palota, Talosaga ma Tofiga Faale-Faavae.*

Faaluaina e le sui usufono mo Gagaiformauga 2 ma le Minisita mo Punaoa Falenatura ma le Siosiomaga.

Na faamaonia le lafo.

P.P.2023/2024 NU.1, LIPOTI A LE KOMITI O TUPE MAUA MA TUPE TOTOGI I LE P.P.2022/2023 NU.71, LIPOTI FAALETAUSAGA A LE FAAPUTUGATUPE O FAAMANUIAGA MO TAGATA MATUTUA O SAMOA MO LE TAUSAGA FAALETUPE 2021/2022 - ILOILOGA

P.P.2023/2024 NU.76, TALIA LE MALO I LE P.P.2023/2024 NU.1

P.P.2023/2024 NU.2, LIPOTI A LE KOMITI O TUPE MAUA MA TUPE TOTOGI I LE P.P.2022/2023 NU. 88, LIPOTI FAALETAUSAGA A LE FAAPUTUGATUPE MO LE LUMANAI MANUIA O TAGATA SAMOA MO LE TAUSAGA FAALETUPE 2021/2022 - ILOILOGA

P.P.2023/2024 NU.77, TALIA LE MALO I LE P.P.2023/2024 NU.2

FOFOGA FETALAI: Tulai mai lau Afioga i le Taitaifono o le Komiti o Tupe Maua ma Tupe Totogi.

Afioga FALEOMAVEGA TITIMAEA TAFUA (Taitaifono o le Komiti o Tupe Maua ma Tupe Totogi): Lau Afioga i le Fofoga Fetalai ou te faatu le lafo, *Ina ia faautagia e le Fono Aoa le Lipoti a le Komiti o Tupe Maua ma Tupe Totogi o lo o tuuina atu ai ana Sailiiliga, Fautuaga ma Iugafono.*

Faaluaina e le sui usufono mo Faasaleleaga 2.

Na faamaonia le lafo.

FOFOGA FETALAI: Ou te tapa lau Afioga i le Minisita o Tupe.

Afioga Hon LAUTIMUIA UELESE VAAI: Lau Afioga i le Fofoga Fetalai ou te faatu le lafo, *Ina ia faautagia e le Fono Aoa o Tali a le Malo e faatatau i Fautuaga o Lipoti e lua (2) a le Komiti o Tupe Maua ma Tupe Totogi.*

Faaluaina e le Minisita mo Taaloga ma Alagaoa mo le Fiafia o Tagata, Minisita mo Punaoa Faalenatura ma le Siosiomaga ma le Minisita mo Fesootaiga ma Faamatalaga Tekonolosi.

Na faamaonia le lafo.

FOFOGA FETALAI: O lea ua maea faautagia Lipoti e fa (4) a Komiti faapea foi Tali a le tatou Malo. E fa (4) tatou Lipoti lea ua tatou talanoaina e fua mai ai lou taimi ua fuafuaina ina ia fua i ai tatou Lipoti ia e fa (4). Tulai mai lau Afioga i le sui usufono mamalu mai Faleata 3.

Tofa LEALAIPEPULU RIMONI AIAFI (Faleata 3): Faafetai i lau Afioga i le Fofoga o le Fono mo le avanoa, E fia fai sina manatu i Lipoti ia e 4 ua faataatia i le Laulau a Fono.

Muamua, o Lipoti ia e 2 i le Penisione a le Palemene. E le o se mataupu fou lenei mataupu ae talu ai o lea ua pay le siitaga NPF a tagata faigaluega uma a le Malo i le 10% a o lea e alagataua ua i ai se fuafuaga e pei ona tuuina mai i fautuaga ua tataua ona siitia le penisione a le Palemene. O se mea tataua ma talafeagai. Ua leva foi ona tuuina mai i totonu i Paeaiga talu ai peitai e moomia mafuaaga tataua e siitia ai. Ou te talitonu lau Afioga ma le mamalu o le Palemene ua talafeagai lenei vaitau pe a fua i le tulaga o le tamaoiga, e fua foi i le tulaga ua i ai le siitia o le NPF a le aufaigaluega a le Malo.

O le mafuaaga ma le talitonuga sa faatino ai lenei fuafuaga o se fuafuaga sili ona lelei vaaimamao aua sui usufono. O le ala foi lea e ala ai ona ese Penisione a sui usufono ona e le o se galuega e i ai se fuafuaga e umi ona i ai se isi. O tatou uma na o le tai 5 tausaga pau lava lea o le mea e guarantee e le iloa pe toe sau pe leai. O le ala la lea sii maua ai penisione a nai a tatou sui usufono pe a fua i le tele o tagata faigaluega. Ou te talitonu la o lea ua aumai totonu o fautuaga. A o lea foi ua aumai i fautuaga a tagata suesue foi lea na aumai faapitoa mai Niu Sila o mea tau Actuary, tagata ia e faia ma vaai, mo mea o Statistician e vaai le faiga o numera. Na aumai lea e latou le justification ma le mafuaaga tataua e tataua ona siitai. O lea foi la ua aumai le lipoti a lea foi Konesale na aumai ia ma lagolagoina le mau ua tataua ona siitia le tupe faaopoopo a le Malo e totogi e 17.3%. E le gata i lea o le tau o le soifuaga. A o le mea taua lau Afioga ua tataua ona toe iloilo le Tulafono aua na gata mai le iloilo mulimuli i le 1998.

O le mea sa fesiligia pea e lou sui usufono, o le vaega lea o le Tulafono seiloga e sefulu tausaga faatoa entitle i ai i le Penisione. Ia ae manatu o tatou na o le

taitasi a Paeaiga lea e omai ai, e tatau ona toe fetuunai. O le isi mea faatoa tala lava lau tupe pe a aulia le 55 o ou tausaga. E i ai la nai isi sui usufono ia ua leva ona talosaga i vaega ia ae ua le mafai ona e le i atoa le 55 tausaga. Na ou sau i totonu faatoa 38 ou tausaga, o lona uiga, a o lea faatoa 55 nei ou tausaga e lei leva atu nei. O lona uiga ana uma nei lau Paeaiga i le 10, i Paeaiga e lua, o lona uiga ou te faatali mai ai lava i lona taimi faatoa 48 pe 47 ou tausaga seia oo i le taimi e 55 ai faatoa tala lea o le tupe lea. Ae ua tatau ona fetuunai. Ou te talitonu foi o le finagalo sa i ai le Malo ma i latou na tusia le Tulafono i lea taimi ona o le tele o sui usufono mamalu o le Palemene e omai ua matutua. A o lea ua tatou vaai e tele foi sui usufono e omai o talavou. O le ala la lea e tatau ona fetuunai ai le Tulafono lea.

Ae o le mea alagatau o lea ua lua, tolu lipoti ua aumai i le Palemene, o le tali mai foi a le Malo ia se i tagatagai i ai. Lau Afioga i le Tamaitai Palemia ma le Kapeneta, ia ua lava lona tagatagai i lou talitonuga, ae ua tatau ona outou... fai se tou fuafuaga i le tatou Penisione.

Afioga Hon Fiamē Naomi Mataafa: Lau Afioga i le Fofoga Fetalai.

FOFOGA FETALAI: Malie lau Afioga i le sui usufono mamalu, se i tulai mai lau Afioga i le Tamaitai Palemia.

Afioga Hon Fiamē Naomi Mataafa: Leai, o le tali lona e te saunoa mai ai o le tatou Malo talu ai, lea faatoa e saunoa mai i le Faigamalo lenei. Ae taatia mai.

FOFOGA FETALAI: Ia, lea ua manino.

Tofa LEALAILEPULE RIMONI AIAFI: Faafetai, faafetai lona e manaia.

FOFOGA FETALAI: Faaauau le saunoaga.

Tofa LEALAILEPULE RIMONI AIAFI: O lona e manaia, manatua foi o le Lipoti o le 2021/2022 lea e talanoa, ua maea le tou tausaga muamua. Ia ae le afaina, faafetai.

Ona oo mai ai lea i le Penisione a tagata matutua. E talitonu lau Afioga na amata i le \$30.00 i le fia sefulu tausaga talu ai, lea ua oo i le \$200. Ia ua tatau foi ona toe tagatagai iai le tatou Malo i se siitaga talafeagai i le agai atu i luma. E fuafua foi lava... e fua lava i le fua lea na talanoa atu ai, e fua i le tau o le soifuaga aua lea sa sefulu ma ona tupu pasene le inflation lea ua pa'u mai i lalo i le 9% pe a, ia o la e maualuga. Ae e tatau ona toe fetuutuunai mo le agai i luma.

Ae faafetai lava i lenei mea taua sa... o lea e fua e tatou... o lau tala lea e fai i tagata matutua o lea tou te vaai na o le \$200 lea e aumai pe a, ae a outou fua iai o outou lea e feoai fua i vaa, tala fua tou vai, nofo fua i le falemai. E le \$200 la, e ova atu i luga ma le \$200 le faamanuiaga lona ia te outou. Ae tatau ona toe tagatagai foi i ai le Malo i le agai i luma pe lei tatau ma talafeagai ona toe maua se siitaga mo nai o tatou tagata matutua. O le mea lava lea sa sau ai, pe tai lima

tausaga pe tai tolu ma siitai, lea ua oo i le \$34 miliona i le tausaga le tupe lea e allocate e tuu agai i le mea lea.

E i ai lava finagalo ia e feoi ai tagata ma aumai, lea foi na fai nei i le Palota a Niu Sila. E toe taumafai lea e fetuunai le retirement age, tausaga e retire ai le tagata. Ua leva ona tatou omai ai le 55, pe le toe tatau ona toe tagatagai i ai toe tuutuu atu i luga i le 60 pe a ona o lea ua agai foi i luma le soifuaga ua matutua tagata ma o le reflection, o le mea lea e atagia ai i i, o se atunuu foi e alualu i luma lona tamaoaiga ma ona tulaga.

Ou te talitonu ia e feteenai foi aua o le tele o tagata faigaluega e mananao foi nai tagata e vave tala latou NPF i le 55. Ae o lou talitonuga e mafai foi ona tatou faatalanoaina lea mataupu i tagata faigaluega aua a tuu i luga i le 60 le retirement age ona felatai lea ma le retirement benefit foi lea e 65, penisione foi lea a tagata matutua. A e litaea nei i le 55, ia e te fia e faatali, e sefulu tausaga e le i maua lava lau penisione lea e fesoasoani ia te oe. Ae o se manatu faatupu manatu. Ae mafai foi ona ave le option i le tagata ia, a e finagalo lava la e tala lau NPF i le 55, ia e leai se afaina. Ae o le tagata lava ia o lea e finagalo i le 69, le 60 o lo o lava le malosi, ia o se tulaga lelei lea e tagai i ai i lea vaega.

Ona ou oo mai lea i le lipoti lea a le NPF, tele le matatia na ausia e le NPF i lea tausaga faaletupe 2021/2022, ausia ai le \$1 piliona net assets. O se matatia maoae tele na galulue ai, o le afaigaluega ia ma i latou foi na faafoeina le NPF i lea taimi. E le gata i lea a o le taimi tonu lea na atoa ai le 50 tausaga, fausia ai foi ma le fale i Salafai o le NPF, ua tele lea atinae mo le tatou motu tele i Salafai.

Ae o le mea lea e fia agai i ai sau faamatalaga lau Afioga i le Fofoga Fetalai aemaise le Afioga i le Minisita, e tatau lava ona toe tagatagai i le tulaga lea ua i ai nei ona o lea e sau ai o le tulafono lea e i ai nei le Board talu ai, o lea sa i ai lava le Taitaifono o le Failautusi o Tupe, le CEO o le Finance lea e i ai i le lipoti lea. I lou talitonuga ma lau tuualalo i lau Afioga i le Minisita ma le tatou... e tatau ona toe faafoi iai ia le Taitaifono i lalo o le Ofisa o Tupe.

A tagai i ai i le Board lea lau Afioga, e manino lava talu ona sau le tulafono lea a le NPF. O le Taitaifono o le Failautusi o Tupe, e tatau ona i ai se sui o tagata faigaluega a le Malo, lea e tele ina iai le Peresetene o le PSA. E tatau ona iai se sui o le afaipisinisi, e tatau ona i ai se sui o le au employers tagata lea e faafaigaluegaina tagata. O le mea lava lea sa sau ai le NPF. Sa tatau foi la i le MPE ona tagai lelei i le filifiliga o Komiti ia aemaise lava le Komiti a le NPF. E tatou te le faatauagavale i sui o i ai ae e talitonu o i latou uma... o le Komiti Faafoe na sau ai mai lava i le amataga talu ona faavae i le 1972 le NPF lea na sau ai lava seia oo mai i le... Ina ua tulai mai le tulaga lea i le tulafono sa fai a lou manatu i le tulafono, e moni e i ai le tulafono a le MPE ae leaga e i ai le Tulafono o le Principal Act a le NPF. Ia ae peitai ane...o lea foi na aumai lava le fautuaga a le Loia Sili i le taimi lea. Ae afai e moni ma ou te manatua lelei, e tatau lava ona i ai i totonu le sui o le Loia Sili, o le sui o le Ministry of Finance i le Komiti lea. Afai o le pule ua i lalo o le Kapeneta e filifili ai se Taitaifono ae e tatau lava ona i ai se sui o le Ofisa o le Loia Sili ma se sui o le Matagaluega o Tupe i totonu o le vaega lea ina ia faaitiitia ai pei o mea ua tulai mai i le taimi nei. Ia na o se tuualalo lena i lau Afioga i le Minisita leaga o mea uma nei ia o mea tatou te liolio ma puipui iai.

A o le a le oo sau faamatalaga i isi Matagaluega, pau le mea e momoli le faafetai i le Tamaitai Pule ma le Ofisa o le ACC. Faafetai i le tele o galuega aemaise o le faatauina o aseta ia i totonu o le Tala Faaletupe lea, lea aseta lea e sosoo atu ma le ACC. Sa fai ai foi sou vaivaiga talu ai i totonu o le Palemene lenei i lou lava talitonuga faale-tagata, a i ai ni fanua i totonu o le taulaga e toe tau faatauese, e tatau lava ona ave le faamuamua i le Malo. A gafatia e le Malo, faatau e le Malo, toe faafoi mai aseta i lalo o tagata lautele ma le Malo.

Ia manuia tele le fonotaga, faafetai.

FOFOGA FETALAI: Malo saunoa i lau Afioga i le sui usufono mamalu, ia faafetai foi mo lou sao taua mo le lipoti foi a lea vaega o le tatou Malo.

Ia, lau Afioga i le Sui Taitai.

Tofa Hon LAUOFO FONOTOE NUAFESILI PIERRE LAUOFO: Lau Afioga i le Fofoga Fetalai, faafetai mo le avanoa. E maitau atu e le o toe umi foi se tatou taimi i le aso, ia ae lagolagoina foi nisi o mataupu pei ona saunoa iai le Tootoo faatoa mavae atu nei i tulaga o le tatou NPF, Penisiona a Tagata Matutua. E tatau foi ona silasila le Malo i lou lea talitonuga i le toe siisii i luga o faamanuiaga mo nai tagata matutua o le atunuu, tupe o lo o maua i latou penisione ae faapea foi isi faamanuiaga lautele e i ai le feoaiga i le vaa i Savaii ma... Ia faapea foi mo mea o fualaaui, o fualaaui ma mea o vailaaui mo latou ua matutua ua aafia i gasegase tumau ma nisi foi manaomiaga faapena. Ia pe i ai foi ma nisi faamanuiaga faaopoopo mo latou na. E talitonu e taua tele le latou foi sao i le tele o nisi mea fai a le tatou atunuu ae faapea foi i Tama ma Tina matutua e fesoasoani ai i aiga o lo o limavaivai, e fesoasoani foi i le tausiga o latou ma latou foi seleni pei ona tuuina atu i ai.

O le tatou NPF e le toe tele sau tala e fai i le NPF, pau lava le mea lea ou te vaai atu i le Lipoti a le Komiti ma le Tali a le Malo o pisinisi po o kamupani ia e inivesi iai le NPF, investments a le NPF o lo o lisiina mai ai kamupani ia pei o le Falealimalo i Mulifanua, o le Computer Services, ia o le tatou Submarine Cable. Ia atonu e i ai ma nisi foi kamupani. O le fesili i lau Afioga i le Minisita, po o le a se tulaga o tulai mai i investments ia a le NPF? Aua o lea lava o lo o faapena ona talatalanoa foi le aufaisaofaga, aua o tupe nei a le aufaisaofaga. O latou ia o lo o galulue ma totogi saofaga i le NPF ae o le faaiuga fai ia a le tatou Board faatasi ma le Malo o lo o invest i totonu o pisinisi faapenei. Ia, aua e leai lava se fai saofaga e le naunau ina ia maua mai se return o le investment aua o returns i investments lea foi e fua i ai le pasene, le pasene e maua i tausaga taitasi po o dividends. E pei o le mafuaaga lea ua oo i ai se fesili i tatou investments ia a le NPF.

Saunoa le sui usufono o Faleata pei ona mavae atu nei i tulaga o fofi, ia e faapena foi se lagona i tulaga o tofi o lo o faapena ona i totonu o le tatou NPF ma tulaga o lo o talanoa ai foi le tele o le atunuu i mea o tulai mai i le tatou NPF.

O le Penisiona a sui usufono, ia o le tulaga lea sa sau ai i ia aso sa mafai lava ona tala pe a uma lau Paeaiga muamua i le taimi na ou ulufale mai ai i le Maota. Peitai e pei e na ona tala i tua penisione i le Paeaiga lena na ou sau ai, pei lava

na o le Taitai o le Itu Agai ma le isi Minisita e toatasi e le i talaina i tua la penisione. Ae tala uma lava i tua penisione a isi sui usufono, e oo foi ia au ia sa i ai si au fasi seleni na i ai na tala foi i tua. Ia ona faatulai mai lea o le faiga fou lea tatou te omai ai e tau mai i le asô, o lea la e i ai mo aiaiga ia o le taofiofiga o seleni ina ia i ai se seleni e tua i ai le sui usufono pe a le toe Faipule. E pei o sana ia lea retirement benefit e tua i ai.

O lea foi la ua taoto fautuaga ma tulaga e pei ona iai, o lo o fautua mai, e sii, sii le pasene. A o lea ou te maitau atu e pei o le scheme lea a tatou sui usufono e le o tuufaatasia ma saofaga a tagata faigaluega. O lona uiga a oo ina sii le pasene a le aufaisaofaga i le 8% pe fia lea e masani ona totogi i tausaga taitasi, e le aofia ai tatou sui usufono. E ese lava le tatou scheme, e pei e foliga mai o le tatou scheme e fuafua lava, po o fea le faletupe lea e teu ai tupe a le scheme. Ia afai lava e 5% i le tausaga e maua mai ia ona tau faapena lea ona tau vaevae mo nai sui usufono. Ia ae atonu pe silasila le Malo aemaise tatou sui usufono pe mafai ona toe tuufaatasi le tatou scheme ma le scheme lea a tagata faigaluega, tagata fai saofaga. A sii le 8% o le dividend i le tausaga a le tagata fai saofaga ia lavea atu ai ma tatou i le 8% lena. O le mea lea e i ai e le lavea tatou i le 8%, ia pe 10% foi pe fia le dividend lea e totogi i tausaga taitasi Na o se manatu ma se fautuaga se i silasila ane i ai pe mafai ona fai ina ia maua se tatou foi faamanuiaga ia i tulaga ia. Ae faafetai lau Afioga i le Fofoga Fetalai mo le avanoa.

FOFOGA FETALAI: Malo faafetai, malo saunoa i lau Afioga i le Sui Taitai, tulai mai le sui usufono mo Vaimauga 1.

Afioga SULAMANAIA FETAIAI TAUILILI TUIVASA: Faafetai mo le avanoa lau Afioga i le Fofoga Fetalai ona o le taua foi o Lipoti a le Komiti ua opea i le Maota e momoli ai le agaga faafetai. E avatu lava se agaga e pei ona maua foi ananafi i le Komiti lea o Tulafono Tumau, sa maua foi i le Penisione 2019/2020 ma le 2020/2021 e pei o lea na avatu ai foi e le o saini foi.

O le agaga sa avatu ai ananafi le manatu o lenei... e tataua ona amanaia ma aloaia mea e aumai totonu o le Palemene lenei. E pei ona saunoa foi aemaise o le Taitaifono le Sui Fofoga Fetalai, o le popolega lenei sui usufono o mea uma e tataua ona aumai i totonu o le Maota lenei e faapena e tataua ona i ai uma suafa ma mafuaaga ua le saini ona aumai aloaia lea leaga o mea e aumai totonu i inei e taua i le sui usufono lenei e alu aso sau aso, o la e talanoa o la e opu le suafa e le o sainia. O le a le mafuaaga? E pei o le mea muamua lena e avatu ai faanoanoaga o lea foi ua toe aumai le Lipoti lea e i ai foi sui usufono e le o saini o le Komiti. O le a le mafuaaga e tataua ona faailoa i sina mea laitiiti lava o le Lipoti ae ui i lea...

Ona oo lea i fautuaga. O le tulaga i le tatalo mo le siitia o tatou penisione, faafetai tele lava, e matua lagolagoina e lenei sui usufono. Na maua foi le tulaga o lo o i ai tatou penisione ia o lea ua faatutusa foi ma le aufaigaluega a le Malo a o tatou o Taitai o le atunuu. E pei e moni lava e sui ai le Tulafono a o tatou lava e faia Tulafono.

E le faapea ua fai atu o le tatou Paeaiga ae ina ia mafai lava ona siitia faamanuiaga e maua e Taitai, tulou lava le Maota leni e oo foi i tatou totogi, e augata a le sui usufono ona e tele a nisi o nai ota a lagona e pei o Le Ao o le Malo e faapena e o atu loa ma tatou Palemia ma Taitai o le atunuu, ia e sili ai totogi o le afaigaluega foi lea a le Malo se i tulou.

E pei o le agaga lena e momoli ai le agaga faafetai i le Komiti ua afea le tulaga i le siitia o tatou penisione. O le isi tulaga o le tulaga foi lea i le 5% i le savings i le NPF e avatu foi le tatalo i le Afioga i le Minisita ma le Komiti ona o lea e faalua ona tala pe na tatou entitle ai i tatou faamanuiaga, aua e alu alu lava e fia sata entitle? O la ua maua lau 5000 pe 2000 ia tala.

O le faalavelave la, e na o le faalua lava ona tala ai totonu o le Financial Year ae pei o le tatalo a leni sui usufono, pe le mafai ona tuusaunua pea a alu atu lava ua maua sau \$1000 ia sau i tua leaga o le mea lena e pei e faapena o nai mea na e tua i ai nai sui usufono mamalu.

O tulaga i le fautuaga ina ia fai uili, e pei e tau augata le sui usufono i le tulaga lea e o e fai uili e pei o lea ua talanoa i le oti. A o lea e naunau le sui ina ia tatou umi ona tatou feola, e pei o lea ua aumai le fautuaga lona 2 lena ia tatou sui usufono e o e fai uili po o ai e uili i ai. E pei o le agaga lena e pei o lea o le a fautua mai e le Komiti le mea patino a le tagata ia. E faatoa fai a lata uili pe a faalogo atu o le ata oti. E pei o le agaga lena a o lea pei o le a faamalosi mai e fai le uili, o le aiatatau lena a ita ia e pei e faapena pe uili i lota toalua pe uili i lata fanau, e faapena, ae o le mea patino lava lena a le sui usufono.

E tuuina atu i le Komiti o Tupe. E momoli le agaga faafetai i le tulaga o le Penisione a nai o tatou tagata matutua. O le tulaga o lo o maua e le o po se lilo, e lagolagoina le fautuaga ina ia galulue ai Fono Faavae. E le gata la o tatou Tama ma Tina matutua o le a o atu i fafo ae le o po foi se lilo i o tatou Tama ma Tina matutua lea maua nai faamanuiaga i atunuu mamao, o lea foi e omai o lea maua e o a latou e toe... Ia se i silasila i lena vaega.

O e foi ua toe foi mai ma aumai iinei ae a pe a tuu ia lena mea e ola ai nai o tatou tagata ia e le o maua ni sitiseni a o lea foi e maua o lea foi e entitle lava nai o tatou Tama ia e omai i si nei lava 200 i le masina. E pei o le agaga lena e lagolagoina ai fautuaga ina ia galulue i Pulenuu ma Fono Faavae po o ai lava se Tamalii o lea Itumalo, ia logo le Ofisa ina ia mafai ma faatasi foi ma e ua maliliu.

O le ACC lea e avatu ai le fautuaga i tagata maliliu, ona o le tulaga lau Afioga i le Fofoga Fetalai pei e entitle lava na o e o lo o fai a latou ACC a o e la e maliliu i luga o le vaa tulou pe maliliu i luga o le sami...

FOFOGA FETALAI: Ou te faamalulu atu i le sui usufono e le i oo le tatou talanoaga i le Lipoti a le ACC e na o le 4 tatou Lipoti ia e talanoaina nei. O le ACC o le isi tatou Lipoti lena e sosoo ai ae faauma maia lau saunoaga.

Afioga SULAMANAIA FETAIAI TAUILIILI TUIVASA: Ia e faamalulu atu e advanced tele le Vaimauga, ae pau lena o le agaga faafetai. E momoli le agaga faafetai e lagolagoina ai le Lipoti lea ua tuu mai totonu o le Maota.

FOFOGA FETALAI: Malo faafetai saunoa i le sui usufono mamalu, o lea foi ua faaalua lou finagalo. Malo faafetai.

Talu ai ua tatou taunuu i le tatou taimi manava ua manatu foi o lea foi ua faaiuu mai saunoaga a sui usufono mamalu a le Palemene. Tatou talosia ia le aso a taeao ona faaauau ai lea o tatou Lipoti i le Taitaifono faapea foi le Afoga i le Minisita.

A ua faamalo usufono i lenei aso le paia e o le tatou Palemene o lea ua tatou taunuu mai le tatou taimi manava ua tatau foi ona fai se tatou malologa. Tatou talosia ia i le alofa o le Atua i le aso a taeao. Faamalo le onosai i lenei aso.

Ae tatou te le i tolopo ou te talosaga atu i le sui usufono mo Vaisigano 1 e saunia se tatou tatalo e faai ai le tatou fono.

Na tolopo Taualuamaga a le Fono Aoaofa i le itula e 1:04 i le aoauli, seia aulia le Aso Faraile, 15 Mati 2024 i le itula e 9.30 i le taeao.